

ŁOTYSZE INFLANT POLSKICH

A W SZCZEGÓLNOŚCI
Z GMINY WIELŃSKIEJ POWIATU RZEZYCKIEGO.

OBRAZ ETNOGRAFICZNY

PRZE
STEFANIĘ ULANOWSKĄ.

CZEŚĆ II.



W KRAKOWIE.
NAKŁADEM AKADEMII UMIEJĘTNOŚCI.
BIURO GŁÓWNE W KNIPIARNI SPÓŁKI WYDAWNICZEJ POLSKIEJ.
1892.

Kōzu dzīsmis.

1.

Iz bōlenim gostūs gōju,
Celá labi nazynōju,
Zeilá maņ celi rōda,
Laksteigola rosu traucá.

Datecieju zīd upeitá,
Pōri tikļ navarieju,
Aš pajiemu zīdu sauvi,
Tō aš pōri pōrleigōju.

Datecieju zalt upeitá,
Pōri tikļ navarieju,
Aš pajiemu zalta sauvi,
Tō aš pōri pōrleigōju.

Datecieju saulis upá,
Pōri tikļ navarieju,
Aš pajiemu saulis máitu,
Tō aš pōri pōrleigōju.

Vacōkam bōlenám
Zīdu sauvi pašķiņkōju,
Vidiškam bōlenám,
Zalta sauvi pašķiņkōju,

Mozōkam bōlenám
Saulás máitu pašķiņkōju,
Cymdu, zāču adeitōja,
Meikstas vītas taiseitōja.

2.

Kur tu īsi bōleleņ,
Boltys kōjas audamīs?
Īšu mōsysis apraudzeitu,
Dzieržu tautys nycynoj.

Da vōrteņu nadajōju,
Tak mōsená raudōdama.
Tāč mōseņ vār vōrtenis,
Lai tak munys kumielenis.

Soki praudu munu mōseņ,
Kas tāv gauži ryudynova?
Voi dīveri, mōseicas,
Voi dīveru tāvs ar mōti?

Ni dīveru, mōseicenás,
Ni dīveru tāvs ar mōti,
Tautu dāls naveikleitis,
Tys maņ gauži ryudynova.

Leiņ ōrā znūta šķeļms,
Áj ar mani parunōtu,
Kō mōsená gauži raud?
Voi jei smolka nasamola,
Voi jei bolta naizvielāja?
Tovs kaklenš, a muns zūbyns,
Kō mōsená gauži raud?

3.

Vysi putni kōzys dzārá,
Stradenš sād raudōdams.
Stroda šķeļma nalaiduši,
Kam bičeri sadauzāja?

Viļcenám rasna reiklá,
Tys bej lobs stabuļņiks,
Začeišam leikas kōjas,
Tys celená lūceitōjs,

Kraukleišam malni svōrki,
Tys bej lobs kukareitš,
Zeileitái osi nogi,
Tei bičeri nosōtōja.

Slūkas máita dreizalená
Tei iudiná nesiejená.
Iudisnená nosojūt,
Nūkreit zalta gredzinenš.

Gredzinená vaicojūt,
Tryuka treju bōleleņu.
Voi bej lākļ iudinī
Voi tautēņu komonōs?

Lobōk lācu iudinī,
Na tautēņu komonōs,
Laidit munu augumeņu,
Lai syt viļni malenā.

4.

Aš beju zeileitá, zeileitis máita,
Lieču iz zora un iz ūtora,
Iz treša lākdama, īraugu tautinás,
Deveinu rateņu, symts kumieleņu,
Cyts zalta grūžūs, cyts īmaveņūs.

Teciņ dataku da brōlā vōrtu,
Atrodu brōleiti pi vōrtu stōveit.
Lyudzama, brōleit, slādz vōrtus valā!
Atslādzā brōleitš raudōdams.

Teciņ dataku da klietenās,
Atrodu māršu pi klietes stōveit,
Lyudzama, māršē, slādz klieti valā!
Atslādzā māršenā raudōdama.

Teciņ dataku da teineitāi,
Atrūmu māmeņu pi teinis stōveit.
Lyudzama māmeņ, slādz teini valā!
Atslādzā māmenā raudōdama,

Lai aš apvalku zīdōtu kraklu,
Pabyra zīdeni klietenis vydā,
Saskrāja tautenis zīdeņus lasāt.
Na tai zīdeņu, kai mani pošu,
Rypu, rypu dalderi pa golda viersu,
Ša tāv māmeņ šyupelā nauda par aukliejumu!

5.

Trejs mōsenās ūgōs gōja
Malnyjōs upenās,
Divi ūgu pīlasāja,
Treša tōli aizblūdāja.
Izīt jyrurs malenā,
Atrūn jyuru zvejņiceņu.
Dīvs paleidz! zvejņiceņ!
Paļdis, soka, skaista mārģa!

Plyuņ tu maņ zaļu zōli,
Taiš tu maņ meikstu vītu,
Klōj tu boltu paladzeņu!
Namōk mārģa zōļu plyukņ,
Namōk vītas pataisāt,
Naklōj boltu paladzeņu.

Ni maņ tāvs gūdu cālā,
Ni māmenā pyuru lyka,
Ni mōsenā leidza gōja,
A ni brōleitš pakaļ jōja.
Mienesš maņ tāvs beja,
Saulā muna mōmulenā,
Spūdra zvaigznā leidza gōja,
Ausaklenš pakaļ jōja.
Māmeņ, mārģa nūsleikusā!
Zalt atslāgu maklādama!
Zalt atslāga krāma pierkta,
Ka bierneņu nanūpierkšu
Ni par zalta gabaleņu!

6.

Teišam īveņu sylā stotom,
Lai aug kupla, lai zīd skaista.
Īdama tautōs zareņu laužu,
Palyku zam boltu vylņaineiti.
Īgōju tautēņu ustobā,
Pabyru zīdeni pa golda golam.
Gryb gon tautenis puškōtīs

I vāļ tod nadūšu puškōtīs.
Ir maņ sātā trejs bōleleni,
Ir maņ tāvs, ir mōmulenā,
Ir maņ eistī bōleleni.
Nu bōlelenā gūdenā gaidu,
Nu māmenis mīla vōrdenā.
Likš maņ bōleni ūzulu vaiņuku,
Sāgš maņ māmenā gūdamū sagšu.
Gaismenāi austūt, speidāt, speid,
Sauleitāi lācūt vyzuļoj.
Trejs godi rūženā nazīdāja,
Nabeja rūženis siejiejenis,
Nūvādā tautenī dzīdōdami,
Palyka māmenā raudōdama.

7.

Gaismenā ausa, sauleitā lācā,
Oi agri, agri, sauleitā lācā!
Jaunenīs puiškins zyrgu sadlōja,
Oi, agri, agri, zyrgu sadlōja!
Gryuš nūzapyutā, gauži raudōja.
Oi agri, agri, gauži raudōja.
Gauži raudōja, svōteņūs jōja,
Oi agri, agri, svōteņūs jōja!
Jōšu aš, jōšu, iz jaunu maitiņu,
Oi agri, agri, iz jaunu maitiņu!
Da jaunai maitināi trejs sādi priškā,
Oi agri, agri, trejs sādi priškā!
Pymajā sādā dzagūzā kiukoj,
Oi agri, agri, dzagūzā kiukoj!
Ūtrajā sādā, syt laksteigola,
Oi agri, agri, syt laksteigola!
Trešajā sādā sād jauna maitinā,
Oi agri, agri, sād jauna maitinā!
Jauna maitinā labi pazyna,
Oi agri, agri, labi pazyna,
Labreitu dāvā, rūceņu stīpā,
Oi agri, agri, rūceņu stīpā!
Rūceņu stīpā, gradzynu meja,
Oi agri, agri, gradzynu meja!
Par mīlū saucā muteitis dāvā,
Oi agri, agri, muteitis dāvā.

8.

Kiukōja dzagūzā ōbeļu dōrzā,
Pīlīcā gaļveņu pi ōbelā,
Sādāja maitinā aiz gaļdenā,
Pīlīcā gaļveņu pi galenā.
Vairōk maņ aiz gaļdenā nasādāt,
Jaunōkū bōleņu naudzāt,
Vairōk maņ vaiņuku nanosōt,
Vairōk maņ māmenās naklausāt,
Jaunōkū mōseņu naudzāt,
Vairōk maņ aiz gaļdenā nasādāt,
Vairōk maņ vaiņuku nanosōt,
Vairōk maņ māmenās naklausāt,

9.

Ei vonog, vanadzeņ,
Kō tu lieci par upeiti?
Kur tu lieksi vanadzeņ
Ar tīm voska spōrnenim?
Liekšu bryutis apzavārtu
Pi svātas lauleibas.
Divi vādā aiz rūcenās,
Trešs vieli žālōjās,
Catūrtam sirdš sōpāja.
Navar vaira pacīš,
Sōp muna sirgsnenā
Kai rudinā zōleitā,
Bierst maņ asarenās
Kai vosoras leitenš!
Kō maņ vaira žāla beja,
Voi tō tāva, mōmulenās,
Voi eistō bōlelenā?
Ni maņ žāl tāva ar mōti,
Ni eistō bōlelenā,
Kai maņ sova vaiņucenā,
Kai maņ sovas vīglas dīnas!
Daskrīn zalā leidacenā,
Nūraun munu vaiņuceni!
Jam bōleni ūša laivu,
Dzenīs muna vaiņucenā!
Kū mōseņ aš dadzeišu?
Vaiņuks tautu klietenā,
Sudabrenā vadzeiti!

10.

Kur laimeņ tu stōvieji,
Kai aš gōju tautēņōs?
Vydā jyura iz akminā,
Boltu putu gabalenā
Kam tu maņ nasacieji,
Kaida tautu dzeivōšona
Būt akmini īvālusā,
Na kōjeņū īsārusā
Kab aš būtu zynōjusā,
Kurū ceļu tautys jōja,
Aš būtu itū ceļu,
Ar odotom izspraudusā.
Kab aš būtu zynōjusā,
Kurū ceļu brōli jōš,
Aš būtu tu celeņu.
Ar audaklym izklōjusā.

11.

Ai, īšu, īšu, tī nabīšu,
Tī na munas ir mōjas,
Tī malna maizā i tōs maņ nadūd
I tōs pošas maņ žāloj,
Sveši ļauteni, borgi vōrdeni
Komoj munu sirgsneņu,
Aš īšu, īšu, kur boltō maizā,
Nikod nažālōta un nikod naaizlykta,
Kur mīleīgi brōli, un mīlas mōsas,

Un žieleīgi kaimini.
Aš īšu, īšu iz mōmuleņu,
Iz tū rūžu dōrzeņu,
Tī aizkiukōšu kai dzagūzeitā,
Mūdynōšu māmeņu.
Izīt māmenā nu jaunas klietš
Rūcenis lauzeitama,
Baļsenā muma cik rauduleīga,
Jau napazeidama
O, celīs celīs bierneni muni,
Pazaklausātīs baļsenā,
Tī na dzagūzā i na raibkōjenā,
Tī ir jiusu mōsenā!
Patīš aš asmu tova maitinā
Osorās nūsleikusā,
Badōs, nalaimās deļ jiusu īkrytusā!
Kur jiuš bejot cik nažieleīgi,
Maņ jaunu svōtōdami,
Pi tik brīsmēiga un oplomeīga
Cylvāka atdūdami?
Tagad aš raužu dīnu un nakti
Un raudōšu da smiertš,
Cikam mani Dīvs vysu žieleīgais
Napīscās nu jums škiertīs.

12.

Pīkususā atsasādu
Strauj upeitis malenā,
Izskrīn zalā leidacenā,
Nūraun munu vaiņuceņu.
Tei nabeja leidacenā,
Tei bej puiša mōmulenā!
Jemit brōli ūša laivu,
Dzenitās pakalā!
Ūša laiva gryuta beja,
Dzili gryma iudinī!
Jemit brōli līpa laivu,
Dzenitās pakalā!
Līpa laiva vīgla beja,
Tei dadzyna vaiņucenā,
Aiz upeitās, aiz kaļnenā,
Dreivenīka klietenā,
Pakōrt zalta vadzeiti.
Moz beja divi symti dūti,
Vaiņuceņu dabōti.
Aš jam devu pīci symti,
Gaļveņu pagrīzā,
Vaiņuceņu nadāvā.
Tevi pošu aicynova
Dīnā vydu parunōt,
Myužam sāv sadarāt,
Smolku kraklu deviejeņu,
Meikstys vītys taiseitōju.

13.

O, dzilā zīmenā, solts rudineitš,
Sokōs muns bōlenš jimt ļaudaveņu!

Kū aš dareišu, cik jauns pajimšu!
Taiseišu laiveņu, strauj upās, malenā,
Syuteišu siveņu iz svešu puseiti!
Raud muna sivenā svešajā puseitā.
Naraudi gauži, napyuti gryuši,
Par godu, par ūtru, aš patš tī bīšu!
Maņ navajag taida puiškāna,
Irā maņ sātā jauns bōlelenš,
Irā maņ stallī bārs kumielenš,
Tam devu auzuņu pasejōdama,
Tam devu ōbulu palaseidama,
Tam taisu tyltu nu rūžu lapeņu,
Tī braucā kungi, tī starostenis,
Tī muni brōli māršenās vādā,
Tī lyku cymdus, tī kulaineišus.

14.

Kūkleitis skanā upeitis molā,
A kab maņ zynōt kas tī kūklej,
Dūtum lobreitu, lobvakareņu.
Dīvs tāv paleidzi, mōsenā,
Vālik tāv pateik taut ustabenā,
A maņ napateik.
Āj mōseņ ōrā, siest komonōs,
Paļdis jiusim, brōleiši, par aukliejumu,
Dareišu pyureņu paraksteidama,
Klauseišu māmeņu patacādāma.

15.

Jiudž tautīt lobu zyrgu,
Lai aš brauču iz brōlim,
Zynu, zynu, brōlā sātu,
Navajag vodōtōja!
Vōrtūs stōv veitulēš
Masteitim zarenim,
Seiki strodi sasāduši
Masteitūs zareņūs.
Soka strodi sādādami:
Kas tī brauc? zámá reib?
Atbrauc mýsu mōsenā,
Kur dzeivōja Krīvzámā,
Poša malna kai vabalā
A doncōtoj kumieleni.
Nadabrauču pi vōrteņu,
Sazatryuka brōlā suni,
Iztak muni bōleleni
Kai tī ōru ūzulenī,
Iztácāja māršas munas
Kai īvenis zīdādamas.
Iztak muna māmulenā,
Zeīžauteņu raksteidama,
Asarenis slauceidama.
Ok, tu muns mīlēs bārnš,
Kai tu tyki šaizámā?
Ok tu muna mīla mōtā,
Jau aš poša nazynōju,

Kai aš tyku šymā zámā,
Akmiņš stōv iz iudinā
Smylga gryma dybynā.

16.

Ūdzeņu gōju lasāt
Ar mozū bōleleņu,
Kurū ūdzeņu nūraunu.
Tu īmatu bōlenám.
Maitu kūki prīdā ar āgli,
Zīmā zali, vosor zali,
Puišu kūki pūra kōrkly,
Vosor lopōs nūlopōja.
Apdzenāja syla prīdi,
Lai jei aug apdzeneita,
Sadarāja tautu maitu,
Lai jei aug sadereiga.
Sadereiga viņ nūmyra
Bōlenám ļaudavenā,
Vacs palyki, najam cytas,
Tōm lelōm žalobom
Žāl itai tō kūcenā,
Kur aug dzili iudinī,
Žāl mōtái tō biernenā,
Kur vojā vītenā.

17.

Tá nataidi kūki auga,
Kaidi kūki Vidzemā,
Iz akmini līpa auga
Pazeļteitim zarenim,
Sudobrōtam lapeņom.
Pylny zori seiku putnu,
Stradenš sād vīersyunā.
Kas tī brauc? zámá reib,
Atbrauc pīcu brōļu mōsa!
Āj stradeņ vōrtu vārtu!
Stradenš vōrtu naatvārā,
Atver poša brauciejenā,
Strodam kaunu padarāja,
Aizīt priškā eista mōtā,
Zeīžauteņu raksteidama,
Asarenis slauceidama.

18.

Kur jōsi, kur jōsi, jauns puiseiti?
Kur šūnakṭ, kur šūnakṭ pōrguleisi?
Voi jimsi atraiti, voi mīļōsi?
Voi dūsi maizeitis, atraitis bārnim?
Ni jimšu atraitis ni mīļōšu,
Ni dūšu maizeitis atraitis bārnim!
Atraitis gulta izgulāta,
Seņ mīlī vōrdi izrunōti!
Kur jōsi, kur jōsi, jauns puiseiti?
Kur šūnakṭ, kur šūnakṭ pōrguleisi?
Voi jimsi maitiņu, voi mīļōsi?
Voi maitas vaiņuku paglobōsi?

I jīmšu maitiņu i mīļošu,
I maitas vaiņuku paglobōšu!
Aizdādž māmeni gaišu gunteņu,
Īsim maitinās iz vaiga vārtīs
Voi šmuka, voi bolta, voi sorkona?
Voi boltās drābeitās, voi bogota?
Ni šmuka, ni bolta, ni sorkona,
Ni boltās drābeitās, ni bogota!

19.

Dzīdi, raudi, tautu maita,
Tova pošas vainā beja,
Kur aš oru, kur ecieju,
Tī tu dzyni ganeidama,
Kur aš zyrgus pyutynōju,
Tī tu gūvis guldynōji,
Kur aš kōru zūbyneņu,
Tī tu sovu gredzineņu,
Kur aš kōru capureiti,
Tī tu sovu vaiņuceņu!

20.

Vakar mōtā krūgā dzārā,
Maņ pōrdzārā zvejņīkam!
Ak, jiuš jyuru zvejņīceni,
Pīci bolti bōleleni,
Voi rādžajat munu mōseņ?
Kaida beja jiusu mōseņ?
Bolta, skaista mýsu mōseņ,
Sorkons rūžu vaiņucenš.
Siestīs brōleit, laivenā,
Dzenīs mōsai pakalā
Da puš upis malenā!
Sād, mōseņ raudōdama,
Asarenis slauceidama.
Siestīs mōseņ laivenā,
Brauksim oba atpakaļ!
Aš nabraukšu atpakaļ
Cikam iudinš nūzaskrīš,
Dzīdōš ōru laksteigola,
Cikam kiukōš dzagūzā,
Cikam kūki salopōš!
Niu ar Dīvu zalās stygas,
Vaira jiusu nameideišu,
Niu, ar Dīvu smolki kryumi,
Vaira jiusu nagraizeišu!
Niu, ar Dīvu skaistas pučis,
Vaira jiusu naplyukōšu!
Niu, ar Dīvu, brōli, mōsas,
Vaira jiusu naredzeišu!
Niu, ar Dīvu tāteit, māmeņ,
Vaira jiusu naklauseišu!
Pamāt sovu tāvu, mōti,
Áj ar svešu cilvieceņ,
Tai nameili tāvs ar mōti,
Kai mīls svešis cilvieceņš.

21.

Kū dūmoj tu tāteit,
Maukdams munu gredzineņu?
Voi dūmoj cytu pierkūt,
Voi saukūt sovu ļaudaveņu?
Navā naudys cytu pierkūt,
Saukšu sovu ļaudaveņu!
Cikam saulā reitā lākš!
Jau sauleitā reitā lāc,
Áj ar Dīvu tautu maita,
Maņ ir sova ļaudavenā,
Gaid, rudinā atejūt!
Kod atgōja rudinš laiks,
Nazynōju kaidu jimūt,
Voi nabogu bōrineiti,
Voi bogotu mōtis maitu?
Lobōk jīmšu bōrineiti,
Na bogotu mōtis maitu,
Býš mīleiga dzeivōšona,
Dīvs dūš montu dzeivojūt!

22.

Tymsa, tymša tei ágleitā,
Kur cauneitā nakti guļ!
Nu kureinis tu puiseit
Ar cik jauku volūdeņu?
Nu Vidzemis aš māmeņ,
Patš ar sovu vajadzeibu!
Aš gryb jiusu maitu prasāt!
Vīna pošā maņ maitinā,
Tei par jauna, tei par moza,
Jai vajaga reiksti beitis,
Na pec jaunim puišim steigtīs!
Jiuš māmeņ vaci ļaudš,
Kam cik glupi runojot?
Pulkim skrāja jyura putni,
Pa pōrim i pōrojās.
Taipať daiš jaunim ļaudim
Pa pōrim nūdzeivōť.

23.

Avīšas, upenis, vyss iudinš apjāmā
Maņ jaunu tāvs ar mōti pi veira atdávā,
Atdūdams pīsacāja cīma nastaigōť,
Cīma nastaigōť, kōju nalauzāt.
Dzeivōju aš gadeņu, dzeivōju aš ūtru,
Iz treša gadenā sajiemū laidu prōteņu,
Pazamešu par dzagūzi, skrieju iz tāva sādu
Aš kiukōju tāva sādā ar žieleigu bolsu,
Moža maņ mōtā izdziersš, brūkaš vōreidama.
Mōtā brūkaš izvōrāja, manā naizdzierdá!
Aš kiukōju tāva sādā ar žieleigu bolsu,
Moža maņ mōsa izdziersš siņcis slauceidama,
Mōsa siņcis izslaucāja, manā naizdzierdá!
Aš kiukōju tāva sādā ar žieleigu bolsu,
Moža maņ vacōkīs brōlš izdziersš zyrgus ganeidams,
Brōleitš zyrgus pīganāja, manā naizdzierdá!

Aš kiukōju tāva sādā ar žieleigu bolsu,
Moža maņ jaunōkīs brōļš izdziersš
Pa sādu staigōdams, putnus saudeidams.
Pavaicōja iz vacōku: voi saut, tū dzagūzi?
Paga, brōleiņ, nasaut, moža mýsu mōsa?
Ka tu mýsu mōsa, skrīņ iz mýsu sātā,
A ka čyra dzagūzā, skrīņ iz zaļū mežu!
Ka aš skrieju par mežim, vysi meži leika,
Ka aš skrieju par teirumu, vyss teirums zaļš palyka,
Pošam lobam kūkam Dīvs nadává lopu,
Poša eistō rodná maná napazyna.

24.

Pa kam var pazeiņ avišas kōrklys?
Oi agri, agri, avišas kōrklys,
Pa kam var pazeiņ bōrini pulkā?
Oi agri, agri, bōrini pulkā?
Augši sādā, iz zámá vārās,
Oi agri, agri, iz zámá vārās,
Tautys rádžāja, gryuši jei pyutá,
Oi agri, agri, gryuši jei pyutá,
Gryuši jei pyutá, osoras lāja,
Oi agri, agri, osoras lāja!
Navā maņ tāva kam gūdu cáļt,
Oi agri, agri, kam gūdu cáļt
Navā maņ mōtá kam pyuru līkt,
Oi agri, agri, kam pyuru līkt,
Navā maņ brōļu kam leidza braukt,
Oi agri, agri, kam leidza braukt!
Navā maņ mōsu kam golvas glaust
Oi agri, agri, kam golvas glaust!
Tovs tāteiņ aiz treju atslāgu,
Oi agri, agri, aiz treju atslāgu,
Pymō atslāga acis samīdzá,
Oi agri, agri, acis samīdzá,
Acis samīdzá iz vya myuža,
Oi agri, agri, iz vya myuža,
Placus samīdzá ūzula goldi,
Oi agri, agri, ūzula goldi,
Dzaltona smiļktš iz kryušu guļ,
Oi agri, agri, iz kryušu guļ,
Tova māmená aiz treju atslāgu,
Oi agri, agri, aiz treju atslāgu,
Pymō atslāga acis samīdzá
Oi agri, agri, acis samīdzá,
Acis samīdzá iz vya myuža,
Oi agri, agri, iz vya myuža!
Placus samīdzá ūzula goldi,
Oi agri, agri, ūzula goldi,
Dzaltona smiļktš iz kryušu guļ,
Oi agri, agri, iz kryušu guļ!
Tove brōleiņš aiz treju atslāgu,
Oi agri, agri, aiz treju atslāgu,
Pymō atslāga acis samīdzá,
Oi agri, agri, acis samīdzá,
Acis samīdzá iz vya myuža,
Oi agri, agri, iz vya myuža!

Placus samīdzá ūzula goldi,
Oi agri, agri, ūzula goldi!
Dzaltona smiļktš iz kryušu guļ,
Oi agri, agri, iz kryušu guļ!
Tova mōsená aiz treju atslāgu,
Oi agri, agri, aiz treju atslāgu!
Pymō atslāga acis samīdzá,
Oi agri, agri, acis samīdzá!
Acis samīdzá iz vya myuža,
Oi agri, agri, iz vya myuža,
Placus samīdzá ūzula goldi
Oi agri, agri, ūzula goldi,
Dzaltona smiļktš iz kryušu guļ,
Oi agri, agri, iz kryušu guļ!

25.

Snyga, snyga šei dīnená,
Apsnyga Annenái boltu galveņu,
Kryta muns vaiņucenš,
Bet nakryta bōleņūs!
Kryta tautu ustobā
Zam dīvera kōjenám!
Vaiņuceņu nūraudōju
Kai i tāva, mōmulenás,
Vaiņuceņu nosōjams
Vīgli sūli lāc myuženš!
Brōli, mōsas, naturot
Da vokora druvīnā,
Vokors nōk un myglu mat,
Rosa bierst vaiņukā.
Vaiņuk munu, vaiņuceņu,
Vairōk zalta, na sudobra,
Tū maņ pierka pīci svaini,
A tū deveini bōleleni.
Šūs ōreņu maita beja,
A na šūs puišu ļaudavená,
Vaiņuceņu viņ pakaru
Šūs ōreņu maleņu.
Aiz kū rūža šūvosor
Cik sorkona nazīdāja,
Jau rádžāt i paredzieji,
Nūvāsš tautys kieneniņu!
Paleidzieju mōseņam
Kū varieju paleidzāt,
Devu sovu kumielenu
Rūžu dōrzu saecāt.
Siej bōleņ rūžu dōrzu,
Siej i ūtru maganeņu,
Tautys jōja rūžu dōrzā,
Aš ībāgu mogonās.

26.

Moza, moza ōbeļneica,
Pīcu zaltu ōbeleišu,
Dīvi devu bōlelenám,
Trejus poša paturieju.
Par tū vīnu gūvi pierku,

Par ūtrū kumieleņu,
Par tū trešū nūzapierku
Gon dyžonu oriejeņu.

27.

Stōv māmená pi vōrteņu,
Gaida sovu maitiņu,
Vysas maitas attácāja,
Pedeleitis viņ nabeja.
Pedeleitá nūtácāja
Upis molā raudōdama
Bōleņu maklādama,
Sateik jyurys zvejnīceņus.
O, jiuš jyurys zvejnīceni,
Voi rādžājat bōleņu?
O, gūdeiga mōtis maita,
Kaidi tovi bōleni?
Sorkons rūža, voski moti,
Tī bej muni bōleni?
O, gūdeiga mōtis maita,
Tī bej jyurys dybynā!
O, jiuš jyurys zvejnīceni,
Izzvejojīt pi malenis!
O, gūdeiga mōtis maita
Kū moksōsi par viļkšonu?
Vīnam dūšu zeīžu skustu,
Ūtram zeīžu paladzeņu,
Pi treša poša īšu!
Kas īš leidza tautēņōs?
Mārša īš leidza tautēņōs,
Tei rādžāja kū meklāja,
Kū tlyka pyurenā,
Mani vīnu aizmīļōja
Šō vokora kolpyunāi.
Aš tū, Dīveņ, nazynōju
Kū moksōšu par vosoru.
Aš tāv dūšu zalta krūni
Ar divpadsmīt zarenim.
Aš tū, Dīveņ, nazynōju
Kur maņ beja vīnu likt?
Īdama vokorā gulāt,
Lič sáv golvys galenā
Reitā agrī caldamōs,
Lič sovā gaļvenā,
Aplykusā gaļvenā
Āj iz upi mozgōtūs!
Datecieju pi upeitis
Pīzalīču mozgōtūs.
Datak zalá leidacená
Nūraun munu zalta krūni
Nūnas jyurys dybynā,
Zaļu nīdŗu galenā,
Dzilīs jyurys dybynā.
Jaunas maitas nazynova
Kur sauleitá nakti guļ,
Dzilīs jyurys dybynā
Zaļu nīdŗu galenā.

28.

Kod aš beju jauns puiseiņš,
Polu karaveira,
Aš staigōju pa meženi
Bolūžu saudeidams,
Aš dabova vydā meža
Zaļu, šmuku līpu,
Zam tū zaļū, šmukū līpu
Zalta šyupeleiņš.
Tymā zalta šyupeleiņ
Guļ jauna jumpravenā
Čuču lulu jumpravenā,
Kuram plutam tiksī
Voi tam saučam, voi tam skraučam,
Voi tam skrypaščykam?
A ni saučam, a ni skraučam,
A ni skrypaščykam,
Aš tam pošam jaunam puīšam,
Kurīs manā šyupova!

29.

Pīcu brōļu mōsa beja,
Pa pyuram reitu mola,
Āj māmeņ, pazaver,
Kū dora mýsu maliejená?
Nūit mōtá, atīt mōtá,
Asarenis slauceidama
Valī durovys, valī lūgi,
Naryuc vaira dziernavenis!
Celitās bōleleni, aunitās zōbokūs,
Veļcit lobys kažucenis,
Licīt cauná capureitis,
Sodlojit jjudzit kumelenis,
Sīnit zalis zūbynenis,
Braucīt brōli vīnu symtu,
Dabraucīt augsta kolna,
Augsta kolna malenī
Trejdeveiņu spieļnīceņu
Dīvs paleidzi, spieļnīceni,
Pret kō jiuš spielejot?
Pret tū mōsu spielejom,
Kur šūnakti cauru vādá,
Sorkons rūžu vaiņucenš.
Braucīt brōli ūtru symtu
Dabraucīt augstu sātu,
Vysapleik ūši, kļovi,
Vysi vōrti atslādzās,
Izīt divi jauni puīši,
Sudabrenā zōbokim,
Izīt divi jaunas maitas
Ar vyzuļu vaiņukim.
Īvad mýsus ustobā,
Kumieleņus stajetī,
Paceļ mýsim līpa goldu,
Paklōj boltu paladzeņu
Pīlik boltu bičereišu,

Kai mōsenis mīleigys
Ak, tu munu mīlū mōseņ,
Kai tu tyki šaizāmī?
Aš nazynu mīls brōleiti,
Kai aš tyku šaizāmī?
Nūnāš munai māmenái
Symtu lobu vakareņu,
Ūtru symtu tāteitām
Par šyupelá kōrumeņu
Trešu jaunim bōlenim
Par leikstenis cārtumeņu,
Mozōkai mōsenái
Zaļu zīdu vaiņuceņu!

30.

Doncoju, spieleju, vysu cauru nakti
Ar tū vīnu jaunu máitu,
Jau tei spielá dreiz pa golam,
Īsōk viná raudōt
Naraud, munu mīlū sirgsneņ,
Aš tāv labi aizmoksōšu,
Dūšu treju symtu dalderu,
Dūšu sovu jaunū bōleņu!
Nagrybu aš tovu treju symtu dalderu,
Nagrybu aš tovu jaunu bōleņu!
Ir maņ pošai eisti bōleleni,
Ir maņ stallī bāri kumieleni,
Tūs aš jjudzu, dancynoju,
Tīm nešu auzeņu pasejōdama
Tīm nešu iudisneni nu olūta,
Taisu vīteņu nu rudzu zīdeņu,
Taisu tiļteņu nu rudzu lokstu,
Tī jōja tautys, tī bōleleni,
Tī munu pyureņu nūrytynōja,
Tī mani pošu nūvyznōja!

31.

Kraukleits šād ūzulā,
Runoj jauku volūdeņu;
Voi redzieji tu, kraukleiti,
Kur nūvādá mūs mōseņu?
Tī nūvādá jius mōseņu,
Caur skaidru ezereņu,
Siermi zyrgi, jauni roti,
Stalti pyura vediejeni,
Nu zūs kaulu klieti ciertá,
Irbju spolvu jumtu lyka,
Kvīšu cysu vītu taisa,
Rūžu klōja paladzeņu.
Atsagula jius mōsená
Kai sorkona bryuklīneitá,
Atsagula tautu dāls,
Bolts kai putu gabalenš.

32.

Kur tu skrīsi, vanadzeņ,

Ar tīm voska spōrnenim?
Skrīšu līpys pazavārtu,
Voi jei gara izaugusá?
Smuidra, gara izaugusá,
Zori leika Daugová,
Kur ir sausa, šmuka vīta
Tī aug zalta purinená,
Nūrōvusá purineņu,
Veju zaltu vaiņuceņu,
Atskrīdami cīma puīši,
Nūraun munu vaiņuceņu.

33.

Daugavená, Daugavená,
Cyta vīta izsolusá,
Cyta vīta sasolusá,
Kura vīta izsolusá,
Tī aug zalta purinená
Pīzaplyuču purineņu,
Nūzaveju vaiņuceņu.
Atjāmuši jauni puīši
Munu puču vaiņuceņu,
Atdūdīt i jauni puīši
Munu puču vaiņuceņu!
Lyugdāmōs, praseidāmōs,
Pasūlieju cymdu pōri.
Aš nagrybu cymdu pōra,
Grybu pošys adeitōjis!
Pagaidīt jauni puīši
Da cytam rudinám
Lai izauga maņ táleitis,
Lai pyureņu pīdareišu!

34.

Zūsá mōvá pa iudini,
Aš pa laužu volūdom,
Cik pi zūsis iudiņš lypa
Cik pi mani volūdenis.
Škiritās zūs pulka,
Laidīt guļbi azarā,
Škiritās jiuš bōleni,
Laidīt mōsu tautēņōs!

35.

Malni muni kumieleni,
Kai iudinī voguleni,
Tīm bej labi māršas vást
I mōsenis pavadāt!
Lobōk īmu māršu vastu
Na mōseņu pavadeitu,
Mārša dāvá lynu kraklu,
Mōsa prosa sudobra!

36.

Kab maņ bātu cik mōseņu,

Cik auzeņu teirumā,
Tod aš jōs naatdūtu
Kaida krūga dzārōjam,
Kaida celá gōjiejam
Soka maņ: i dzārōjs jimt̄
Vysu myužu ryudynōt̄.
Bolta pučá azarā,
Tei dzārōja ļaudavená,
Bolta pučá atsacāja:
Lobōk zīžu azarā,
Na dzārōja rūceņōs!

37.

Kumeļ munu, boltskareit,
Tu maņ kaunu padarieji,
Klōt stōvāja tautu máita,
Táv kōjená pasleidāja,
Táv kōjená pasleidāja,
Maņ nūkryta capureitá
Kur gūdeiga mōtis-máita,
Padūš munu capureiti,
Tōs capuris dabūmeņu
Bysi muna ļaudavená,
Myužam kraklu šiviejená.

38.

Lobōk kab maņ vylks apādá
Symtu rubļu kumieleņu
Nakai maņ cyts pajāmá
Seņ carātu ļaudaveņu
Cerej mani tautu dāls,
Cerej dīnu, cerej nakti,
Dīnu, nakti carādams,
Nūcerāja vaiņuceņu.

39.

Vuškeņ, tovu boltu vylnu
Māmeņ labi dariejumu,
Kai īvená máita zīd̄
Tautu golda galenī.
Zīdi, zīdi, ōru pļova,
Jau aš vaira nazīdeišu,
Muni zīdi nūbyra
Tautu golda galenī.

40.

Gulāt slūka, gulāt irbá,
Gulāt skrāja vanadzená,
Áj gulāt tautu máita,
Vád̄ i munu bōleleņu!
Gulātu maņ jōit̄,
Reitu agri jōzaceļ,
Smolka maizeitá jōmaļ,
Ostru sītu jōsejoj.

41.

Na kaidam viejenám,

Maganeņu vācynōt̄,
Na kaidam naveiklám,
Nūjimt̄ munu vaiņuceņu!
Nūjem munu vaiņuceņu,
Nūjem munu vīglu dīnu,
Naktái munu vīglu dīnu,
Jem vaiņuku guliejīs.

42.

Paceli, paceli,
Nalyugtī gosti,
Aš beju lyugta,
Aš guļu nakti!
Kō gaidit panōksnīki,
Kam paceli naejot?
Voi jiuš gaidit mīļu topys
Aiz capuris aizbōžam?

43.

Lelu sieju rūžu dōrzu
Kur maņ beja puškōtīs,
Nu tō lela siejumená
Vīna poša izaugusá
Deļ tōs vīnys skaistys rūžys
Bej maņ augstu sādu peiļ
Deļ tōs vīnys tautu máitys
Bej maņ garu ceļu jōt̄!
Dzieržu, ļaudīs runojūt,
Ļaudaveņu atpeļūt
Naklausieju ļaužu māļu,
Jōju patis atvaicōtu.
Dajōju da vōrteņu,
Viná stōv īkš noma duru,
Boltys rūkys lauzejidama
Asarenis slauceidama

Stīp rūceni dūd̄ muteitis
Bysi muna ļaudavená!
Viná rūku viņ pastīpá,
Bet muteitis nāidává!
Kū tu dūmoj, lapna máita,
Ka ar mani narunoj?
Zynu ceļu, mōku jōt̄
Ar borōtu kumieleņu!
Kur b̄yš mōtá deviejená?
Kur máitiná gōjiejená?
Kai rūžená kai pučeitá,
Kai Vōczámis maganená!

44.

Jōju dīnu, jōju nakti
Skaistu máitu maklādams,
Iz to vīna augsta kolna
Skaista máita vielājās.
Pavaicoju sovu sirdi
Voi navari muna b̄yť?
Aš navari tova b̄yť?
Navā mōjā tavs ar mōti!

Paļdis, soku, jaunīs puiseit,
 Niu ir mōjā tāvs ar mōti!
 Niu aš varu tova bīt!
 Pavaicōju sovu sirdi
 Kaidys kleitys tāv bīs pierkēt?
 Malnys kūrpis, zalis kleitys,
 Sorkon rūžu vaiņuceņu.
 Pavaicōju sovu sirdi
 Kaidu muzyku bīs jimēt?
 Pīcpadsmī ar bumbulim,
 Sešpadsmī ar cymbulym!
 Jemīt brōli pīci siermi,
 Vedit mōsu tautēņōs!
 Vysu pyrmōk doncōtē gōju
 Ar tū sovu jaunū bryuti,
 Iz puš daņča naizgōja,
 Nūmierst muna jauna bryutá
 Pavaicōju sovu sirdi
 Kaidā grobā tāv bīs likēt?
 Malnā grobā zalta vōku,
 Ar dimanta kōjeņom!
 Breinīs kungī, breinīs ļauds,
 Kas tī beja nūmieris?
 Viná beja jauna bryutá
 Iz puš daņča nūmyrusá!
 Sok starostom sok kundzenim,
 Lai ikdīnys Dīva lyudz,
 Vyss svātdīnis lai apzvanej!

Eisōs kōzu dzīsmis.

1. Dzīd, ar vīnu, dzīd, ar vīnu
 Vakareju sokumeņu,
 Brauc ar vīnu, brauc ar vīnu
 Reigā jiuģtu kumieleņu!
2. Na eļkšnám taidi goldi,
 Kaidi goldi ūzulam
 Na tautom taidi veiri,
 Kaidi muni bōleleni.
3. Brōli muni kai ūzuly,
 Vysi vīnu lelumeņu,
 Māršys munys savedneicys,
 Cyta lela, cyta moza.
4. Cytam teiču tū maitiņu,
 A patim tyka prōtenám,
 Cikam cyti kōjis ova,
 As sodlōju kumieleņu.
5. Kumieleņ ceļu tak,
 Celám gola nazynōja,
 Mōtá dieleņu auklāja,
 A padūmeņu nazynōja.

6. Lobōk mōtá pazaguļ,
 Na dieleņu aukliejusá,
 Dūš dielenš gaudu vōrdu,
 Dūš dielená ļaudavená.
7. Ļaudaveņ, ļaudaveņ,
 Kas tovā prōtenī?
 Ni tu taiš meikstys vītyš,
 Ni klōj bolta paladzená!
8. Taidys acš Odumam,
 Taidys acš Tekleitái,
 Voi jī beja guliejuši
 Vīnys cyukys midzinī?
9. Tu Odums nazalīdzīs
 Ka Tekleitái nacerái,
 Pi bazneicys rūku devi,
 Tiergā sīra gabaleni.
10. Niu Tekleitá gūda gaška,
 Niu aiz golda sādātōja,
 Naseņ beja tī laiceni
 Ka nu pīstys putru ādá!
11. Nazasmej tu Tekleit
 Dreiz par lyupom šmeikstājās
 Sād, kačeit zam gaļdená
 Vara peicka rūcenī!
12. Tu Tekleiti olu prosi,
 Kur mums beja olu jimēt?
 Sierma kává stelindžūs
 Tei aleņu tacynoļ!
13. Tu Tekleiti dasys prosi,
 Kur mums beja dasu jimēt?
 Raiba kucá mieslīnī
 Tei desenis rītynoj.
14. Tekleitái plotys acš,
 Na nu Dīva lykumeņu
 Kryumi, žogori izplyukōja,
 Pec puišķinu ryukojūt!
15. Kod as beju jauna maita,
 Bej maņ dzīsmu vōceleitá,
 Kai izgōju tautēņōs,
 Apzagōzá kaļnenī.
16. Gon bej plota kļova lopa,
 Kreit zámī grīzdamōs,
 Gon bogota brōļu mōsa
 Īt tautōs raudōdama
17. Iudinš vydā, akminš vydā

- Leigoj putu gabalenš,
Tautu vydā, brōļu vydā,
Stōv mōsená raudōdama.
18. Mōseņ, zalta būržgaleņ,
Kō gōj jauna tautēņōs?
Bōleņ, putu gabaleņ,
Kam tu mani pavielej?
19. Ni mōseņ raud iz manim
Ni iz manim žālojis,
Poša gōja tautēņōs
Lobus ļaudš cerādama.
20. Zynu, zynu, brōlā sātu,
Navajag vodōtōja,
Vōrtūs stōv ūzulenš
Masteitīm zarenim.
21. Raud mōsená vysu ceļu,
Raud pi vōrtu daīdama,
Kam tūlaik naraudōji,
Kod tautom rūku devi?
22. Dzīdōtōjs tautu dāls,
Doncōtōjs kumielenš,
Tys izveilá munu mōsu
Nu deveinu bōleleņu.
23. Soldons ols, bolta konna,
Skaista poša nesiejená,
Izdzāř olu, sasiņ konnu,
Pajám pošu nesiejeni.
24. Prūtu, prūtu, radzu, radzu,
Še mōsená nadzeivoj,
Nasiej vaira smolku rūžu
Bōlelená dōrzenī.
25. Pa vōrtim rūžys sāja,
Pa vōrtim i maganenis,
Pa vōrtim nūleigōja
Poša rūžu siejiejená.
26. Trejs mōsenis, trejs laseitis,
Trejs jaukys volūdenis,
Býš tautom jōsodloj
Trejdeveini kumieleni.
27. Skaiški dzīd trejs putneni,
Smolku lozdu kryumenī,
Zeilá sōcá, žubá vylka,
Laksteigola darynoj.
28. Mozu jiemu, bet bogotu
Bōlenám ļaudaveni,
Puškim nomu slauka,
- Ar īlūkim ustabeni.
29. Nōk Dīveņ, nōk laimeņ,
Mōtá ar maitu dalājās,
Pušu škeira gubu lelu,
Pušu boltu vylnaineišu.
30. Gaileiši maņ padzīdá
Iz azara zvejojūt,
Dzanu laivu malenī,
Taku caltu ļaudaveni.
31. Aš beju puiseitš, kai vīns ūzuls,
Maņ vajag maitinis kai vīnys līpys,
Sastopu maitiņu tiļtená golā,
Maņ mīļ maitiná bez sova gola.
32. Kumeļ munu boltskareit
Nagribāja dubļus brist,
Gon tu brissi pūru pūrs,
Ka aš jimšu ļaudaveni.
33. Nīdru stalleiņ izataisu
Aš sovam kumielenám,
Viejs pyuš, nīdris šalc,
Doncoj muni kumieleni!
34. Timsenš beja, tmsenš beja,
Aš par tymsu nabādōju,
Beja munam kumelám
Zvaigžņu deči mugorā.
35. Skaiški dzīd, olu dzer
Mozijā cīmenī,
Aizītu, kauns aizīņ,
Tī aug muna ļaudavená.
36. Skaiški dzīd celáveiri
Sajiuguši kumieleņus,
Muna mōseņ dzaltoneitá
Ciku leidza nanūgōja!
37. Maitiņ lela, maitiņ moza,
Maitiņ puišam navīrāj
Cik silī iudīņ stōv,
Tik pi puiša praudys ir!
38. Izkoltusá dryču dryva
Kaļnená stōvādama
Lai nūkolst tys puiseitš,
Kurs maitinis nycynōja!
39. Kod aš beju jauns puiseitš,
Aš maitinis viejā laižu,
A maņ patim gadājās
Viejā laista ļaudavená.

40. Kod aš beju jauna máita
Aš par puišu nabādōju,
Aš pōr puišu golvu lieču,
Kai par syla sokōrneiti!
41. Aš cimdeņu naadieju
Bez dzaltona dzeipurená,
Auklej mōtá munu orōjeņ
Dzaltonim matenim.
42. Aš naišu pi tō puiša,
Kuram dzaltoni gari moti,
Kuram dzaltoni gari moti,
Tys osoru dzārōjenš.
43. Gudra, gudra vōvereitá,
Gudri bārnu spyrynōja,
Bārni sād, silenī,
Poša syla maleni.
44. Virbái spōrni nūtrusuši
Pa áglom lūžņojūt
Ļaužu málá nūdylusá
Ap manim runojūt.
45. Sylā taku, sylā ejmu,
Sylā maņ vajadzāja,
Sylā maņ rūžu sātys,
Pa maleni maganenis.
46. Ļustā, ļustā vonogam,
Zeilá čicá kanepōs,
Ļustā tautu naveiklám,
Ka aš augu bōleņūs.
47. Dzīdōtum reitu agri,
Kab gaļvená nasōpātu,
Zādynōtu kab varātu
Tautys munys bōleleņus.
48. Tautys munu vaiņuceņu
Sviž kolnā, sviž lājī,
Veritās bōleleni
Kur jys mani pošu lyka.
49. Cīma kucis satácāja
Munu viēlšu gribādamys,
Ájtá kucis sietenī,
Spriedit sovys pokulenis.
50. Kū dareišu, nadareišu
Jaunu veiru dabōjusá,
Ryngu, ringu pa pogolmu
Kai ar lobu kumieleni.
51. Agri sōka lidiņāt
Trejs palāki vanadzeni,
- Lidiņ zemli, lidiņ augši,
Nadūš maná šūrudiņ!
52. Laksteigola krūni kola
Reigys pilis galeni,
Izkaļ maņ laksteigola,
Šūgod išu tautēņōs.
53. Dīvs, ir gona, Dīvs, ir gona
Loba veira sietenī
I gaileitis iztácāja
Madojōm kōjeņom.
54. Gludu gaļveni saglaužu,
Sādūs brōļu videnī,
Sōka tautys caur jōdamys,
Virbá sād, vonogūs.
55. Kucá, kucá na mōsená,
Tu pīvīli mun bōleni,
Pi bazneicys rūku devi,
Par upeiti sīra svīdi.
56. Aš naraugu vysys jūstys,
Bilá kuply jūstys goly,
Aš naraugu vysu tautu,
Bilá gudrys tautu dāls.
57. Gonūs gōju, rīkstus iežu,
Skaista augu natikleitá,
Kurs puiseitš i mani jimš,
Lai vej garu pōtadzeni.
58. Pyureņu munu, pyureņu,
Na skujeņu pībyrušu,
Māmeņu munu, māmeņu,
Na mīdzeni guliejusá.
59. Sukojit golvu munu,
Mōtu munu napinit,
Lai stōvāja mōti muni
Mōmulenis pynumeņu.
60. Gludu gaļveni saglaužu
Ar tautom nūīdama,
Daskriejusá sveša mōtá
Kai rogonā izplyukōja.
61. Sveša mōtá raganená
Sorkonōm acteņom
Aš ībāgu kanepōs
Vīnā zūbus klabynōja.
62. Kam tu siej rudzu dryvu,
Kod tei zalá nazaļōja?
Kam tu jiemi mani jaunu,
Kod ar gūdu nadzeivoj!

63. Oi, Dīveņ, augši saulá,
Kod vokora sagaideišu?
Oi, Dīveņ, borgys tautys,
Kod myuženi nūdzeivōšu?

64. Kam tautīt oku roki,
Kam táv okys vajadzāja?
Gon tovam myuženám
Munu gaužu asareņu.

65. Rikšim biereiti palaižu
Caur garū syła molu,
Kab maņ sovu ļaudaveni
Stōvu rašt, nagulejūt.

66. Kaida tī gaška īt
Pa lelu teirumeni?
Atīt muna krystamōtá
Zalta pučá rūcenī.

67. Syura, syura sunepeitá
Sāsim celá malenī,
Borga, borga brōlá mōsa,
Dūsīm tōli tautēņōs.

68. Nadzeivōšu, nadzeivōšu
Aš pi tevá bōleleņ,
Tevá deļ dzeivōtum,
Borga tova ļaudavená.

69. Cyuka, cyuka, na māršená,
Bōleņ, tova ļaudavená,
Kai ciucená ryukstādama
Caur manim cauru gōja.

70. Jam bōriņ bōrineiti,
Bōrinám lela rodná,
Dīvs - tāvs, laimá - mōtá,
Dīva dāly bōleleni.

71. Mōseņ munu, bōrineit,
Táv gaļvená nasukōta,
Treju reitu rosa stō
Tovu motu galeņūs.

72. Vīna poša rūža zīd,
Maganeņu dōrzenī,
Vīna poša mōtis maitiņ
Bōrineišu puļcenī.

73. Namōcieju bōleņus
Ándžu duru vryņōt,
Kai mōcieju tautēņōs
Izcaldama īcaldama.

74. Dzīd, mōseņ, līksmojīs

Šū vosoru bōleņūs,
Līksmōsīs cytu vosor
Ar tautīša mōseņom.

75. Ok, tu munu maigū mīgu,
Nūbāgusá ļaudavená,
Paladzeni viņ atrodu
Iz klietenis duraveņu.

76. Še atjōja krysta-tāvs,
Kai lelīs muižinīks,
A īlōpenš iz vādara,
Kai lelīs ezerenš,
Še atjōja krysta-mōtá,
Kai lela muižineica,
A īlōpenš iz vādara,
Kai lelīs ezerenš

77. Kryukli ciertu, īva leika,
Atsaspīdá lazdenī,
Mōsu vežu, mōtá raud,
Brōli lūkā kumieleni.

78. Bolta pučá azarā,
Zalá nīdrá malenī,
Bolta pučá mōsa beja,
Zalá nīdrá ļaudavená.

79. Ar pučēiti laivu dzynu,
Pretim sovu ļaudaveni,
Lai īt muna ļaudavená,
Kai pučēitá zīdādama!

80. Zīd, mogona, na tai zīd,
Kai zīd, rūža dōrzenī,
Mīl mōseni, na tai mīly,
Kai mīl sovu ļaudaveni!

81. Nazalūki lūku bierzš,
Na táv viņū vieji pyutá,
Nazaraudi munu mōseņ,
Na táv viņū tautys vādá.

82. Atraitneiti bōleleni
Jam atraitni ļaudaveni,
Lai iz tevi nazaraud,
Div laulōti gredzinteni.

83. Brōli mōsu pōrdavuši
Pōr kōpustu lizeiceni,
Kōpustenš izāduši,
Prosa mōsys atpakaļ.

84. Siej auzenis teirumā,
Jam atraitni ļaudaveni,
Voi auzenis na maizeitá,
Voi atraitná na ļaudova?

85. Sudobrōta zeilá dzīd,
Stallá spōris galenī,
Zalta pučá vōrtājās
Zam kumelá kōjeņom.
86. Sudobrōta saulá lācá,
Maņ gulejūt šyupelī,
Pazeļteita nūrītā,
Maņ ejmūt tautēņos.
87. Pūrā dzymu, pūrā augu
I cik pūrā nanūmyru,
Paļdis tautu naveiklám,
Tys izvylka malenī.
88. Aš sovam mīlyjam,
Meikstu vīteni taisieju,
Divi ailis skuju klōju,
Trešu smolku adateņu.
89. Aš sovam mīlyjam
Mīlu skusteni rakstieju
Apleik rokstu mīlus vōrdus,
Pati vydā sirdi sovu.
90. Mýsu puiši bādōjās,
Kur býš škáltļ lemesneicys?
Tekleitái lela pīrá,
Tī býš škáltļ lemesneicys.
91. Mýsu bōbys bādōjās
Kur býš liť sūmozgenis?
Tekleitái lels vādars,
Tī býš liť sūmozgenis.
92. Teklá šur īdama
Blākys syta pavāderī
Mīsta puiši dazadyurá,
Blākys viņ nūskanāja.
93. Odu cymdus kulaineiš,
Rezeknīšu gaideidama,
Valns atvádá Viļōnīti,
Tam atdevu raudōdama.
94. Vaiņuks munu, rūžu veitu,
Nanūkryta bōleņūs,
Nūkryta tautu klietenī
Zam orōja kōjeņom.
95. Zorus muns vaiņucenš,
Nalein tautu klietenī,
Laužu zoru īdama,
A ūtoru izīdama.
96. Dūd, māmeņ, kam dūdama,
- Na dūd, mani kaļveišam,
Trejs dīnenis saraudōju
Kaļva krakla valādama.
97. Kaļveitš kola dabasūs,
Ūglis byra Daugovā,
Aš paklōju paladzeni,
Maņ pībyra sudabreni.
98. Smuidra, gara tautu maita,
Bez darbená gonūs gōja,
Bez darbená gonūs gōja,
Bez pyurená tautēņos.
99. Kas gryb soltu iudisneni,
Lai smeļ upis dybynā,
Kas gryb jaunys ļaudavenis
Maņ mōsená šyupelī.
Dūd, tautīt, zaltu naudu
Jam ar vysu šyupeleiti.
100. Laiks tāv býtu, mōseņ,
Tautu durs vyrynōt
Jau pyurs vōku vodzá
Klietái greida īlyuzusá.
101. Pučeiť munu, ļaudaveņ,
Patš aš tevi audzynōju,
Patš aš tāv Reigā pierku,
Vyzuļu vaiņuceni!
102. Zvīdzūt zirdzeni palaižu
Bolt-ōbuļu pļavenī,
Raudūt mōseni atstōju
Tautu golda galenī.
103. Putāt puť smiļktīs kōjenis,
Maņ ejmūt tautēņos,
Na tī puť smiļktīs kōjenis
A tī puť laužu volūdys.
104. Ausa gaismená ausdama,
Lācá sauleitá lākdama,
Šūnakť mani sveši ļaudš,
Kai putneni vōrdzynōja.

Vysaidys eisys dzīsmis.

105. Īva ar lozdu līlājās,
Obi vīna lelumená,
Lozda zīd, skaisti zīdi,
Īvai kaunu padarāja.
106. Mežinīks mežu gōja,
Meža rūta mugorā,
Tōšu šyuba, kreja biksis,

- Baravika capureitá.
107. Poša dzieru krūdzenī,
Veiru sieju zedenī,
Cikam poša krūdzenī,
Veirs apādá zedeneiti.
108. Guli, guli saimineica,
Tovi dorbi padareiti,
Cyuka pupys izrevāja,
Koza škina kōpusteni.
109. Sylta, saulá, korsta saulá,
Maņ rūženis revejūt,
Maņ izkusa zalta jūsta,
Div sudobra gredzinteni.
110. Ūgu, ūgu, sieņu, sieņu!
Vaicoj bōba nūmierdama,
Kū darieji dzeivōdama,
Ka naiedi ūgu, sieņu?
111. Raudiveitá, plaudiveitá,
Dyuni jaucá azarā,
Navarieju bōlenám
Boltu kraklu izvōlāṭ.
112. Pīter, brōlš, bundzinīks,
Tova sīva stabuļneica,
Īt par sylu strumpādama.
Ōžam rogu nūlauzdama.
113. Nazasyrdi dālu mōtá,
Kod aš ilgi aizaguļu,
Tova dalá mīlŷ vōrdi,
Muni boltŷ paladzeni.
114. Daņci, daņci, kunga maita,
Kanepōju krekleņūs,
Najimš tevi kunga dāls,
Nasaukš tevi gaspaženis.
115. Mārga gūdu paslāpusá
Zam bierzená žagareņu,
Bierzenš lopys salopōja,
Mārga gūdu nadabōja.
116. Dūd, Dīveņ kolnā kōpṭ,
Na nu kolna lājenī,
Dūd, Dīveņ ūtram dūd,
Na nu ūtra mīly lyugṭ.
117. Vysi orōji teirumā,
Muna orōja navaida,
Niulá mōtá kōjis ová
Munam lynu orōjam.
118. Teci munu kumieleni,
Tevi gaida, manī gaida,
Tevi gaida auzys silī,
Manī jauna ļaudavená.
119. Mōseņ munu, skaista, bolta,
Malnā ļaužu rūcenī,
Žāl maņ cytam atdūdūt,
A grāks patim maldynōṭ.
120. Moza beju, nasaproto,
Leidu laimis piertenī
Maņ laimená krāslu cālá,
Vyzulenim kōrsteidama.
121. Traidu, raidu, raidu,
Kas pa celi skraida?
Jauni puiši skraida,
Jaunys maitys gaida!
Ak tu puisš, telá purnš,
Kam tu jaunu maitu gaidi?
122. Mōtá maitu izdūdama,
Dzīd, rūcenis plateidama,
Mōtá moltu nūīdama,
Raud, gaļveni sajymdama.
123. Ceiruleitš olu dora
Pošā mīta golā,
Vāļ na tai, vāļ na tai,
Sōksim mās nu gola!
124. Ceiruļ, veiruļ,
Kod tāv kōzys bŷš?
Reit, voi pareit
Jimšu cīlovys maitu.
125. Kur mōsenis sagōjam,
Kur sejenis sanásám?
Lobā brōlā ustobā
Gara golda galenī!
126. Skanādama pōrtecieju,
Par bōlená pagaļmeni,
Skaņ zeileitá, skaņ pūdzená,
Skaņ vyzuļu vaiņucenš.
127. Maná deļ tu bierzeni
Lopoj zalta lapeņom,
Ni aš vaira tá dzeivōšu,
Ni nu tevá slūtu grīzšu!
128. Spriežu, spriežu kūdalenī,
Graužu sausu gorūzeni,
Ni saspriežu kūdalenī,
Ni sagraužu gorūzenis!

129. Navarāja ceiruleiņš
Iz kōjeņu nūstōvāt,
Īraudzāja cilovai
Zam ásteitis malnumeni!
130. Namōcieju, namōcieju,
Ragaveņu pataisāt,
Sovu tāvu, mōmuleni,
Sileiti i vyzynōju!
131. Mīļoj mōtá, kō mīļoj?
Mīļoj sína pļōviejeni!
Lela zōlá, zalta rosa,
Gryuši vylki izkapteni!
132. Sadzīdit stroda bārni,
Ka na dzīd laksteigola,
Laksteigola aizmygusá
Straujis upis malenī.
133. Paļdis, soku, laimenái
Par ōrisku dzeivōšonu,
Cytys máitys pūru bryda,
Aš ōrisku ōbuleni.
134. Dzīdōdama mōtá kōra
Dielenám šyupeleiti,
Raudōdama maizis prosa
Nu dielená ļaudavenis.
Dūd dielenš gaudu vōrdu,
Dūd dielená ļaudavená.
135. Kas kuram bādys beja,
Ka maņ mozs orōjenš?
Poša arkleni iznešu
Augstijā kaļnenī,
Orōjs ora kaļnenī,
Olūts tak lājenī.
136. Sukoj siermi, sukoj bieri,
Obi tāva kumieleni,
Siermeišam auzu devu
Biereišam sánaleņu,
Ar siermeiti Reigā brauču,
Ar biereiti bazneicā,
Siermeišam zalta dečš,
Biereišam sudobra.
137. Ni vīnam napasōku
Sovu lelu žālabeni,
Pierduknái viņ pasoku
Kur nūslauku asarenis.
138. Láj leiteni vīnu dīnu,
Naláj vysu vasarenī,
Maņ pabōda vīna dīna,
Natei vysa vasarená.
139. Leitenš leiņ namōcāja,
Myrdzynōt myrdzynōja,
Tautys rōt namōcāja,
Ryudynōt ryudynōja.
140. Leitenám nūlejūti
Sadzu boltu vylnaineiti,
Tauteņom atejmūt,
Sādūs sovūs bōlelenš.
141. Vylks ar kozu sadarāja
Iz deveinu vosoru,
Treju dīnu nagaidāja,
Kryta kozai mugorā.
142. Aizamiersa maņ dzīsmeitá,
Izajjudzá kumielenš,
Pasokit maņ dzīsmēiti,
Patš aizjiugšu kumieleni.
143. Lobs ar lobu sazatyka
Leiciņ leika Daugaveņ,
Kur máš divi škeiromās,
Kōjis mierka osorōs,
Kōjis mierka osorōs
Leidz povoršku vītenái.
144. Voi īvená, voi lazdená,
Zīd celá malenī,
Voi svaineitá, voi mōsená,
Patur munu kumieleni.
145. Vysu mežu izstaigōju,
Taida kūka nadabōju,
Vara zori, zalta lopys
Sudobrōta viersyuneitá.
146. Šmuka, gleita aš izaugu,
Nazabeidu saulis, leita,
I ar puisī nagulieju,
Sova vaiga nasmulieju.
147. Aiz kaļnená máitys dzīd,
Aiz miglenis naredzieju,
Nūzajemu capureiti,
Nūst migleni vacynōt.
148. Doncōt gōju ar máitom,
Naudu bieru zōbokūs,
Soka máita doncōdama,
Táv sudobra zōbacenš.
149. Spriedit máitys, ryutit máitys,
Kunga dūtys pokulenis,
Mýsu pošu pokulenis
Pálá vylka midzinī.

150. Kundzenš sovu gaspaženi
Ar ōbuli kairynōja,
Orōjs sovu ļaudaveni
Ar maizis gabaleni.
151. Teci, teci, kumielen,
Lipa lopys brauceidams,
Ka pamaneisi jaunys maitys,
Tec gaļveni grūzeidams.
152. Boltu, lynu grūžus veju,
Sudobrā mārčādams,
Pyrma rūkys nūmozgōšu,
To grūžōšu kumieleni.
153. Bolts zirdzenš, jauns orōjs,
Teiruma galenī,
Kab maņ bȳtu tys zirdzenš,
Tō zirdzená orōjenš.
154. Da ceļu pūrā brydu
Da sovai māmenái,
Da tautu naītu
Ni sausom kōjeņom.
155. Sirsneņ munu, paipaleņ
Kō cik gryuši nūzapyuti?
Voi paredzieji slymu dīnu?
Voi na lobu dzeivōšonu?
156. Vysi celeni milāja,
Ka celeni nazynōja,
Vysys mīla cīma maitys,
Ka ļaudavenis navaida.
157. Ar kačeiti Reigā brauču
Pīci zierni vazumā,
Reigys kungi priška gōja
Sīkim naudu miereidami.
158. Keiselš braucá par Daugovu
Ar raksteitom komonom
Mozi bārni priškā skrāja
Ar raksteitom lizeikom.
159. Sylta muna ustabená,
Bārza molku kurynōta
Vāļ syltōka, vāļ jaukōka,
Ka māmená ustobā.
160. Pyutit guni, lauzit skolu,
Laidit Dīva ustobā,
Dīvenš stōv aiz vōrteņu
Nūsveidušu kumieleni.
161. Bolta īmu, bolta taku
Bōlenám sīna kostu,
Pataiš maņ bōleleņ
Bolta kūka grōbekleīš.
162. Kas maņ kaitys nadzeivōti
Pi bogota saiminīka?
Malna putra vādarā,
Bolta šyuba mugorā.
163. Kas vylkam, kas lōčam
Mežā kōra šyupeleīš?
Kas munam bōlenám
Karā dāvá ļaudaveni?
164. Šyupoj mōtá, auklái mōtá,
Namáš maná iudinī,
Ka tāv pošai navajag,
Dūd ūtram par ganeni.
165. Zīdi, zīdi, rudzu vōrpa
Deveinom aileņom,
Muns bōlenš kleti ciertá
Deveinim orūdim.
166. Lōci, lōci, kō tu gaidi?
Voi tu sovu dīnu gaidi?
Atīš dīnys nazynomys,
Palikš dzīsmis nadzīžamys.
167. Soka gaileiš iz visteņu:
Vássim máš iz kaneþom,
Reitā atīš leita dīna,
Navarās i volkōtīs.
168. Pyuti, pyuti, bolūdeīš,
Na tu munu bādu pyuti,
Patš tu sovu bādu pyuti,
Sovs biernenš borōdams.
169. Zynu, zynu, prūtu, prūtu,
Kō vajaga jaunim puišim,
Skōbys zyrys, tryšu maizis,
Vacys bōbys pōrgulāš.
170. Maita puišu nancyn,
Voi gōjusá, nagōjusá,
Puisseiš ádá rudzu maizi,
Mīžu dzārá olūteņ.
171. Dili, dili, vacīs tāvs,
Par Daugovu sīnu pļaut
Div kukuli kvīšu maizis
Ōža ūlys pavolgai!
172. Ūdenš kiulá masaleni
Pi ceļmená pīspīsdamsi
Ak tu lelīs namešņiks,

Cik tāv beja sitiejená!

173. Puiseitš, mīlšs, ļūbej maná,
Naād, maizis drupanenis!
Duraks beju, paklausieju,
Trejs dīnenis naiedš beju!

174. Skaista sīva, bolta kāvā,
Tam biedeiga dzeivōšona!
Skaistu sīvu jōsorgoj,
Boltu kāvi jōmozgoj!

175. Tautītš līlōs, a aš moza
Sokōs maná sagaidāť,
Dzāť iudini, grauz akmini,
Tō tu maná sagaideisi!

176. Izdzierdu ceiruli
Nagūda putynu,
Pōrdevu kažuku,
Cik nasasolu!

177. Lai par bādu valns bādoj,
Aš par bādu nabādōju,
Lyku bādu zam akmini
Lela celá malenī,
Lai guļ bāda raudōdama,
Īmu poša dzīdōdama.

178. Gauži raud, atraitneitá,
Pi arklená stōvādama,
Lobs zirdzenš, lobs arklenš,
Orōjená viņ navaida!

179. Zynu, zynu, prūtu, prūtu,
Kō vāg jaunom maitiņom,
Boltu záču, malnu kūrpu,
Sorkons rūžu vaiņucenš.

180. Puiši, puiši,
Kas nu puišu?
Navā puišim tykumeņu!
Maitys jōja pīgulī,
Puiši guļ sātmalī,
Kucis meiza capuřōs!

Mīga i bērnu dzīsmis.

181. Uci ļuli, mozīs bārns,
Kas tevi reitu paleigōš?
Jauni puiši kultu gōja,
Jaunys maitys moltu gōja,
Tāvs kažuka lōpāť,
Mōtá putrys vōrāť.

182. Kačeiť, runceiť

Atvād, mīdzeni
Caur klieteni,
Caur māmeni,
Caur ustabeni,
Īlič šyupelá galenī.

183. Čī, čī, putineni,
Pa lapeņom tacādams,
Kō tu prosi? Pīna prosi?
Kū darieji tū vosor?
Kam gūteņu naganieji?

184. Sytom plaukstenis,
Capom desenis
Gostim pāpená,
Bārnim sulená,
Tāvam ar mōti kauleni
Ar kū pastabulāť.

Gonu dzīsmis.

185. Prruš! gūtená raibaleitá,
Kas tāv raibu raibynōja?
Svāta Mōra raibynōja,
Svātu reitu ganeidama.

186. Triciņ, trič tei malená,
Kur māmenis goni gona,
Kur jōj tāva pīguļnīki,
Ni lapená nanūčaukst.

187. Viersi, viersi, bulli, bulli,
Tova mutá namozgōta,
Teč lājenī, mozgoj muti,
Kōp kaļnenī maurōdams!

188. Suneišam maizis devu
Pa lelam gobolam,
Suneitš maņ paleidzāja
Brōlā gūvi paganāť.

189. Slūka jōja pīgulī,
Ar deveini kumieleni,
Aš tecieju vōrtu vāť,
Maņ atdává deveitū.

190. Zyrgi zvīdz, zvoni skaņ,
Dīvenš vādá pīguļnīkus,
Goni dzīd, gūvš maun,
Mīlō Mōra gonus vādá.

191. Cyuku goni rupuceiši,
Cyukys zeida kaļnenī,
Pamanāja lūpu gons,
Sazalaidá lājenī.

192. Cytkōrt beja taidi laiki,
Žydi jōja pīgulī,
Jau sauleitá brūkastīs,
Atjōj žydi traljōdami.

193. Obi lobi tāvs ar mōti,
Obi lobi cyuku goni,
Cyukys zōli izādušys,
Teli plōvu izrokuši!

194. Vacīs tāvs, sierma bōrda,
Kōzys gona pa sileni,
Skaņ silenš, trič bōrdená
Iz kazeni borutīs.

Bōriņu dzīsmis.

1. Žāloj Dīvs, žāloj laimá,
Maņ navā žālōtōja!
Vysi muni žālōtōji,
Guļ zam zaļu velieneņu,
 Aš pacieļu velieneni,
 Celīs muna mōmulená
 Nazaceļšu aš bierneņ,
 Cikam saulá dabasūs!

2. Tec sauleiņ, pagaid mani,
Kū aš tāv pasaceišu!
Nūnāš munai māmenái
Symtu lobu vakareņu!
 Māmeņ munu nūmierdama
 Līč kōjeņu galenī,
 Napamáņ svešai mōtái
 Diuris dūņ, motus rauļ!
Lobōk myra tāvs muns,
Nakai muna mōmulená!
Tāvs pajámá cytu sīvu;
Aš myužam bōrineitá!

3. Kab tei muna māmená
Saulis myužu dzeivōjusá,
Ni pītryuktu mīlu vōrdu,
Ni līku gabaleņu.
 Lobōk moza nūmyrusá,
 Nakai lela izaugusá,
 Aš gulātu zam zámeitis,
 Kai zam boltu velieneņu.
Pīceiti maņ māmená,
Kai jau pati zynōdama,
Satiņ sovu sirsneni
Boltys vylņys kūdelī!
 Škītu sovu mōmuleni,
 Krūgā dzartu nūgōjušu,
 Atsarodōs ganeidama,
 Guļ zam zaļu velieneņu.

4. Gryuši pyutá syla prīdá,
Smolka leita pīlejusá,
Gauži rauļ tī bierneni,
Rádž pamōti atvadūt!
 Voi bīš maizis deviejená?
 Voi ar kōji spārōjená?
 Na bīš maizis deviejená,
 Bīš ar kōji spārōjená!

5. Bolta vysta ūlys dāja,
A palāka izperāja,
Sova māmená audzāja,
Sveša mōtá maldynōja.
 Vysta cōleiti atškeira,
 Maņ atškeira mōmuleni,
 Cōleitš tak draudzeitī,
 Kur, māmeņ, aš teceišu!

6. Vysi kūki aug kaļnenī,
Paagleitá lājenī,
Vysi bierneni puļcenī,
Bōrineitš aceplī.

7. Lāč sauleitá reitā agri,
Spīd par lūgu ustobā,
Bōrineitá jūstys audá
Tymsijā kaktenī.

8. Mauroj munys táleitis,
Raužu poša ganeidama,
Táleitōm pūra zōlá,
A maņ sveša mōmulená.

9. Kab maņ bītu sovys tāvs,
Sova eista mōmulená,
Aš bītu līpys kuplumená,
Ōbuļzīdu boltumená.

10. Kas zierneiša nanūrōvá
Lela celá malenī?
Kas bōriná naryudynō
Bez māmenái dzeivojūti?

11. Sveša mōtá bōrinám
Par gunteni maizi dává,
Tec apleik, bōrini,
Lai rūcená nasadag!

12. Loba bītu auzu maizá,
Kab na garys sānalenis,
Loba bītu sveša mōtá,
Kab na borga volūdená!

Karaveiru dzīsmis.

1.
Iz to lauka zalá zólá,
Kas var býť?
Iz to lauka zalá zólá,
Tys gon var nütikt!
Iz tós zólis zalta rosa,
Kas var býť?
Iz tós zólis zalta rosa,
Tys gon var nütikt!
Iz tós rosys sorkon rúža,
Kas var býť?
Iz tós rosys sorkon rúža,
Tys gon var nütikt!
Iz tós rúžys boltys gultys,
Kas var býť?
Iz tós rúžys boltys gultys,
Tys gon var nütikt!
Iz tós gultys raibi deči,
Kas var býť?
Iz tós gultys raibi deči,
Tys gon var nütikt!
Viers gulāja karaveiri,
Kas var býť?
Viers gulāja karaveiri,
Tys gon var nütikt!
Sasaudeiti, sašpuļoti,
Kas var býť?
Sasaudeiti, sašpuļoti,
Tys gon var nütikt!
Klōtu stōvā siermi zyrgi,
Kas var býť?
Klōtu stōvā siermi zyrgi,
Tys gon var nütikt!
Raud, pec mani tāvs ar mōti,
Kas var býť?
Raud, pec mani tāvs ar mōti,
Tys gon var nütikt!
Raud, pec mani brōli, mōsys,
Kas var býť?
Raud, pec mani brōli, mōsys,
Tys gon var nütikt!
Raud, pec mani ļaudavená,
Kas var býť?
Raud, pec mani ļaudavená,
Tys gon var nütikt!
Naraud, gauži ļaudavená,
Kas var býť?
Naraud, gauži ļaudavená,
Tys gon var nütikt!
Na tu vīna tai palyki,
Kas var býť?
Na tu vīna tai palyki,
Tys gon var nütikt!
Palik daže mōtis maita,
Kas var býť?
Palik daže mōtis maita,

Tys gon var nütikt!
2.
Bōlenš gōja karākaltu
Napuškōtu capureiti,
Lāč mōseņ rūžu dōrzā,
Puškoj brōlám capureiti!
Dzidōdama appuškōja,
Raudōdama pavadāja.
Dzid, mōseņ, raud, mōseņ,
Tu maņ vaira naredzeisi!
Atsyuteišu kumieleni
Ar bādom apklōtu,
Pavaicōsi iz kumieleni,
Kur palyka jōjiejeņš?
Tī palyka jōjiejeņš,
Kur kreit veiri kai ūzuly,
Kur nu kaulu tyltu grāda,
Skaudzī mastys capureitis,
Zōrdūs krauti zūbinteni,
Ašnis plyudá Daugavenī,
Viejeņš motus purynoj,
Saulá kaulus balynoj;
Kur dvāselis pulkim it
Iz Dīveni žālōtūs:
Pijám Dīveņ tōs dvāselis,
Karākaltus bōriņus.
3.
Bāri zirdzeni, iz jūs sedleni
Gaida sovu jōjiejeni,
Sīšu zūbynu pi muna sōna,
Vajag braukť maņ iz vaida!
Raud, jau maitiná, raud, manis rūžená.
Pi sōna maņ stōvādama.
Naraud, maitiná, naraud, pučēitá,
Kai izjōšu, tai atjōšu!
Ka naatjōšu, karā palikšu,
Atskriš muns bārs zirdzeņš,
Zirdzeņš muns atskriš, atskriš muns bāris,
Jys atnásš munys brunis,
Atnásš grōmotu ašni raksteitu,
Tymā grōmotā gradzynu,
Siť grōmateni pi skreinis vōka,
Izlič gradzynu iz piersta,
Tik skreini atgōzsi, maņ pīmineisi,
Tūlaik tu nu sirdš raudōsi,
Gradzynu redzeisi, maņ pīmineisi
Līsi gaužys asarenis.
4.
Ciž nalaimeigs asmu cylvāks nu jiusu atstōdams,
Sovu tāvu, māmeņ, myužeigi pamasdams,
Brōļus, mōsys, radinīkus i draugus aplaižu,
Patš išk dzeļžim kai bōriņš viņ vaižu!
Išu tagad svešā molā kai piedeigīs bōriņš,
Par uperi inaidnikim palikšu kai jierenš,

Kur osorys par dzierīni i bādys par maizi!
Bjš deļ mani nalaimeigu sávkuru viņ ʒaizi!
Tī staigōšu vakteigs, bruņōts, vōrgim apgryutynōts
I ar lelu nūskumšonu vysod pīseitynōts!
Tī brodōdams ašnī brōļu, i patš dreiz iznikšu,
Nu zūbyna, voi nu lūdis myužeigi aizmigšu!
Puškys, blisis, vysys brunis brīsmēigi aizskanās,
I par manim tū pādejū ʒaizeiti aizzvanās,
Tī iz bāru sazalasās vylki, putni, suni,
Naaizmierstit par dvāseli jiuš koč draugi muni!

5.

Aš gotovs karaveirs,
Gotovs kara kumielenš,
Tōs dīnenis viņ gaidieju,
Kod kienēnš zini dūš.
Kod atgōja grōmatená,
Tod aš sādūs iz kumieleni,
Kod izsādu iz kumeli,
Atsavieru atpakaļ,
Kas pec mani gauži raud?
Raud, muns tāvs, raud, māmená,
Ļaudavená vaira raud!

Gauži raud, muns tāteitá
Par šyupelená kōrumeni,
Gauži raud, mōmulená
Par mōsenis šyupōjumu,
Vairōk raud, ļaudavená
Par vaiņuka nūjāmumu!
Kab bŷtu taida žielesteiba
Nu tīm kara viersinīkim,
Vastu leidza ļaudaveni
Lai rādžātu ļaudaveni.

Kaida dzeivá soldotam!
Puškys, lūdis, dzīd, kai bitš
Ap tu munu augumeni,
Vāļ tys osīs zūbintenš
Iz gaļvenis lidinej!
Voi nu lūdis, nu zūbyna,
Aš jau myužeigi aizmigšu!

6.

Div bolūži paļtī dzārá,
Izdžaruši plyvynōja,
Div bōleni karā gōja,
Obi gōja raudōdami.
Voi bjš īti, voi naīti,
Voi palikti šai zámī?
Šymā zámī loba dzeivá,
Maitys puišim taisa vītu,

A kas taisās soldotam
I soldota biernenám ?
Soldots guļ teirumā
Iz palāka akmistená,
Blisi līk zam gaļveni,
Zūbintenš rūcenī,
Kuru pusi saulá tak,

Tī pagrīž zūbinteni!

7.

Krauklis sād, ūzulá,
Zalta kūklis kūklādams,
Bjš kungim karā īt,
Nagulāť spylvynūs!
Kara īšu aš māmeņ,
Atgōjš, jimšu ļaudaveni,
Tei bjš loba mōtis maita,
Kura mani sagaidās!

Humora dzīsmis.

Dzīsmá par zvierbuli.

1.

Zvierbulš kōzys sataisāja
I daudz gostu aizprasāja,
Vysi putni atsaroda,
Tryuka viņ vīneiga stroda
Prosom dzerit brandaveinu,
Aš pec stroda dreiz syuteišu!
A ni čarkys napīlāja,
Kod iz gūdu strods atskrāja.
Oi stradeni, mīleigīs,
Tu maņ bjš par svōteni!
Áj ustobā, sāsť aiz golda.
Lai-ža gosti nazamolda,
Kukarš zvierbulám runova,
Kod jau maļteitá gotova,
Kod jau laiks gostus borōť,
Kab zūtryka naatsaļdāť.
Tivleņ sōka staigōť pāvs,
Goldauteņus lasāť sovs
I ar traukim skrošāť goldu,
Kab tī tauki naatsoltu.
Laksteigalená mīlōka,
Tova dzīsmēitá jaukōka,
Áj ustobā, sāsť iz krāsla,
Dzīd, pi golda, lai-ža nasnauž
Mīļ gasteni aiz golda.
Tivleņ cālās kōjōs,
Muzykanti tvārá skripkys.
Vysi gōja da kadrilá,
Zvierbulš nivīn naatstōja,
Sōka spielāť, doncōť, gūļōť,
Maizi ašť i naudu bōrstāť.
Kod jau beja paāduši
I pa pylnam padžaruši,
Na vīns iz sōnu gulāja
I kod vokors dagōja,
Vysi pa pōram rozgōja.

Dzīsmá par ōzeiti.

2.

Kur ta tu nūbeji, ōzeiti munu?
Patmaļōs, patmaļōs, kundzeni munu!
Kū ta tu darieji, ōzeiti munu?
Kvīšus myltūs beideliēju, kundzeni munu!
Ar kū tu mierieji, ōzeiti munu?
Ar radzeni, ar radzeni, kundzeni munu!
Ar kū tu streičieji, ōzeiti munu?
Ar kōjeni, ar kōjeni, kundzeni munu!
Ar kū tu staucieji, ōzeiti munu?
Ar bōrdeni, ar bōrdeni, kundzeni munu!
Kū ta tu iedi, ōzeiti munu?
Captus cōļus, kvīšu maizi, kundzeni munu!
Kū ta tu dzieri, ōzeiti munu?
Veinu, madu, veinu, madu, kundzeni munu!
Kur ta tu gulieji, ōzeiti munu?
Pi jumprovys kambarī, kundzeni munu!
Kai ta tevi syta, ōzeiti munu?
Ar pagali, par pakali, kundzeni munu!
A kam tu naklīdzi, ōzeiti munu?
Aš klīdžu, kai naklīdžu, kundzeni munu!
A kai ža tu klīdzi, ōzeiti munu?
Be-e-e, be-e-e! kundzeni munu!
A kam tu nabāgi, ōzeiti munu?
Aš bāgu, kai nabāgu, kundzeni munu!
Kai ta tu bāgi, ōzeiti munu?
Līpa augšōk sieteni, kundzeni munu!

3.

Kūklej, kūklej muns bōlelenš:
Pyrmūdīņ, pyrmūdīņ
Saslimš muna ļaudavená,
Ūtordīņ, ūtordīņ
Aš patš gauži raužu,
Jau trešdīņ, jau trešdīņ
Nūmierš muna ļaudavená,
Catūrtīņ, catūrtīņ
Iznásš munu ļaudaveni
Jau pīktdīņ, jau pīktdīņ,
Boltyjūs gaļdeņūs,
Jau sastdīņ, jau sastdīņ
Dzaltōnōs smiļkteņōs,
Jau svātdīņ, jau svātdīņ
Jys patš krūdzenī,
Ols kannená rūcenī.
Voi dzīdōt, voi raudōt,
Voi jimt, jaunu ļaudaveni?
Lobōk dzižu, nakai raužu,
Jimšu jaunu ļaudaveni!

Dzārōju dzīsmá.

4.

Dzieru, dzieru krūdzenī
Atsagulūs iz mieslīnā,
Kab zynōtu ļaudavená,
Ka aš guļu iz mieslīnā,
Sāta maņ natikt!

Patš aš dzieru, patš gulieju,
Patš laikim gryuši strōdōju!
Kas nu tova strōdōjuma,
Krūdzinīkam peļni nesi,
Táv patim nikō!

Ak, veirs muns, tu dzārōjs esi!
Kluš tu kucá, naráj maņ!
A tu patš kai sunš ráj!
Sātā nakti nagūļoj!
A kod veirs iz krūgu nūgōja,
Tivleņ sirdš muna bādōja,
Kab nu krūgu lab atītu,
Kab iz celá napakrustu,
Kab daguna naizsystu,
Kab atgōjš lab runōtu,
Kab jys mīreigs bŷtu!

Ak, tu muna ļaudavená,
Gudru tovu padūmeni,
Koč gaidieji raudōdama,
Bet sajiemi dzīdōdama,
Ar mīleigu sovu runu,
Ar ļusteigu sovu prōtu,
Ak, tu muna mīleigō,
Ak, tu mona žieleigō!

Dzārōju dzīsmá.

5.

Kas tī klīdzá, kas tī brácá,
Kas tī ōrā klaigōja?
Voi na mŷsu tāvs pīdziers,
Ar cytim gūļōja?
Mōmulená, tu pučená,
Īt mŷsu tāvs pīdziers,
Kas tī bŷš? kas tī bŷš?
Globojtās, globojtās
Bierneni mīleigī,
Cyts iz ceplá, cyts zam ceplá,
Biedzit vysi dreīžeigi,
Aš poša pīškā aizīšu
I veiram durs atvieršu
Raudeigi, raudeigi!

Veirenš īgōjš urá! klīdzá,
Kur muna sīvená?
Deļ kō viná deļ iedīnā
Nikō napamátá?
A ni dasu, ni kilbasu,
Ni ūlōkná, ni studiná,
Nikō viņ, nikō viņ!
Kū aš dūšu, o muns mīlŷs
Kod nikō naturu?
Kod aš poša i ik dīnys
Bodā jau mierstu
Navaru kōju pacált,
Kod acš munys apvyllka
Biedeiba, biedeiba!

Kluš tu bōba, trupieksneja,
Vāļ tu maņ ņūrdeisi?

Kod aš skrīšu, sōnus kuļšu,
Nu maņš naizbiegsi!
Kod aš skrīšu, sōnus kuļšu,
Tovus motus izrausteišu
Pa greidu, pa greidu!

A bierneni klīdzá, saucá:
Nasiť! mýsu mōmulenis,
Mýsu dōrgys lilejenis!
Voi klusásit sivienteni,
Tōs glupōs gūvš teleni,
Tikš jiusim! tikš jiusim!

6.

Vīns gons nūmyra,
Vysi goni raudova,
Zeilá násá viesti
Tāvam ar mōti,
Lai cap plōciņus, lai dora olu,
Lai īt ganeni pavadeitu!
Dzeņš kola šķierstu
Sausys áglis viersyunī,
Cyuka roka dūbi augstā kolnā,
Dzagūzā zvanāja leikā bārzā,
Vysi seiki putneni
Gōja Dīva lyugtu.

7.

Aš patš dundurs,
Sīva muna dūcka,
Sīva maņ kraklu šyva
Šketereitu dīgu.
Ceiruļu, veiruļu,
Sīvu vežu komonōs,
Patš tecieju kōjeņom
Stabuleiti taiseidams,
Atsavieru atpakaļ,
Jau sīvená izkrytusá.

8.

Kas tī mežā kloudzājās
I tai cīži reibājās?
Mušeņ ūds nu kūka kryta
I sáv golvu cīž sasyta,
Gludū kaulu kryuteža,
Ūtrū kaulu gūrn-kauli,
Izsyta nu mutis div zūbus
I nu sōnu trejs kaulu
Vōrnys iz tō bolsa saskrāja,
Slyma ūda apraudzāť.
Dazazyna mýsu mōsa,
Eista mōsená býdama,
Šķiņkoj auzys ar mīžim,
Šķiņkoj dryčus ar kvīšim,
Šķiņkoj zōboks ar pišim,
Div pōrs veižu ar stryčim.

9.

Mōtá gōja klietī,
Aš pec mōtis pakaļ,
Mōtá dává sīra,
Aš tū sīru kačeišam,
Kačš maņ bārnus dává,
Aš tūs bārnus ūzulam,
Ūzuls maņ zeilis dává,
Aš tōs zeilis vepreišam,
Vepreitš maņ tauku dává,
Aš tūs taukus lōceišam,
Lōceitš maņ leiku kāvi,
Aš tū kāvi viļcenám,
Viļcenš maņ padoncōja
Nu kaļņená lājeni.

Ūdenš.

10.

Kas tik jiusu satrivāja
Zam ūzula dyucieja?
Voi na ūdenš nūsleidāja
Iz gaļvenis nūkryta
Nu zora, nu zora!
Tec, skrīn dreizōk myusená,
Apraug sova svōtená,
Kurs koklu salauzāja,
Sōnkaulus sadauzāja
Nūkrysdams, nūkrysdams.
Voi vasals esi ūdenš,
Muns vys mīlšs draudzenš?
Jau máš vair nadoncōsim,
Ar tevīm nagūļōsim
Pa pūrim, pa pūrim.
Naraud myusená manis,
Jimsi tu vysu pec manis,
Palikš táv muni rogi,
Groznyš daguns i nogi
Pec smiertš, pec smiertš!
Divi mārčenis tauku
Býš deļ tevis aizlāja,
Gūrnus sáv sakaļteisi
I ar gali borōsis
Kas dīnys, kas dīnys!
Vāļ aiz desmit ūlekšu
Palikš deļ tevá zornu,
Pīťaiseisi sáv dasu:
Deļ kōzu i krystobu
Nu otkon, nu otkon.
A deļ bāŗu gaļvená,
Plauškys, kōjis, sirsnená,
Spōrnēni i nadzeni,
Oda býš deļ brandīna
Šynkaram, šynkaram.
Kai pa vīnai izdzársim
I glōzeitis apgōzsim
Zyčeidama ūdenám
Mīra ītam biedeigam
Myužeigam, myužeiga.

Uboga dzīsmā.

11.

Māš biedeigi ļauteni
Prosom par jiusim Dīvená,
Kab nu vysys nalaimis
Sorgōtu i dūtu laimi.
Nu vylka spōrneiga,
Nu tōrpa brīsmēiga,
Nu pālis i nu tō kača,
Nu lopsys i nu tō zača,
Nu suná sirdeiga,
Nu saska smirdeiga,
Sorgoj Dīveņ žieleigīs,
Lyudzu tevi aš biedeigīs!
Lai kozys, cyukys, vuškenis,
Syvāni, jāri, teleni,
Zyrgi, vierši i gūtenis,
Atnásš vistená ūlenis,
Kōpusti dōrzā lai vadās!

Radzu saimineica lādōs,
Apgōzť sovu kubuleni,
Atmást mani bōrineni,
Kraklu paškiņkōš maņ vīnu!
Dūš i lyndraku, aš zynu!
Saiminīks sātā ļusteigīs,
Zyn ka aš cylvāks biedeigīs,
Nažālōš maņ grošu pīcu,
Tureišu aš par tu pīcu,
Saiminīki, bōleleni,
Atmetit maņ bōrineni,
Koč veizeitis dūdit vacys
Par dzīsmēišu munys prācys.

Vysaidys.

Vuškená.

1.

Vuškená muna, mīleigō muna,
Kur tu staigōji bez sova gona?
Viejenš cik styprīs, zīma cik solta,
Pa vysom likņom iudīnš izkolta
Apsola zōlá, navā jau sīna,
O, kai dzeivōsi biedeiga vīna?
Pa kurom molom tik viņ staigōsi,
Tī nūskumeigu mani atrassi!
Mušēj dabasi tevi prīcynōš,
Nu zvieru brīsmēigu tevi paglobōš!
Vuškená dōrga, lai tāv kreit rosa,
Tu nūkaļssi, muna vyslobā skrōsā,
Bolta kai snīdzenš, jauka kai draudzenš,
Tik maņ mīleiga, kai eistīs biernenš!
Nikas jau manis nāprīcynōš
I ryugtumus maņ naapsoldynōš,

Cikam aš tevis kur naatrasšu?

I kliepī munā iz kūťš nūnesšu!

Deveini desmit devein pamesšu!

I tevi vōjas vysod mekleišu!

A jō tik viņ aš tevis dabōšu,

Kai draudzineicu pi sirdš pīglausšu!

2.

Tai ļaizi siežu kryumeņūs

Ti iz upeitis styurená,

Nu putnu dzīsmū prīcojūs,

Vys gōdōdama siedieju.

Ak, jiuš putneni laimeigī,

Skraidit i dzīdit ļusteigi,

Nikaidys bādys nazynot,

A Dīvu viņ cīnejot!

Skraidāť ka spōrni pa gaisu

I īšķ vōrgim as izgaisu,

Navā maņ pōrstōšonys,

Vysod sādāja pi sōnu.

Biedeigs aš vīns iz pasaulá,

Koč maņ speidāja taida saulá,

Bet laimá nazkur izgaisa,

Navā ni timsā, ni gaismā!

3.

Sādādama sáv dōrzenī

Īsōka gōdōť mōsená.

O, cik nykna šei dzeiveitá

I šō pasaulá mīleiba,

Kotrys mōnej maņ viļteigi,

Vasdams grākā nažieleigi.

Aplaiž dreiz maņ namīleigi,

Nycynōdams cīž brīsmēigi.

Pōriš dīnys jaunumená,

Izgaiss skrōsa šō vaidzená,

Natureišu sáv draudzená,

Kod guļšūs kopūs bōriná.

Pōriš slavá šō pasaulá,

Leidz kai dyumi i tei myglá!

Acš papliesšu myuža mōji,

Dzeivōdama timsā grobā,

Izvuicāja šōs taisneibys.

Pučeitis skaistys mīleigys,

Ar munom rūkom stateitys,

I ar osorom viņ laisteitys.

Tū maņ sacāja lileja,

Sorgīš pasaulá mōsená,

Runova puču kienená,

Verīs kas tymā dōrzenī

Tik daudz munu draudziniču

Kotrys izplauka nu reita,

Ap pušdīņom aizīdāja,

Zam vokoru jau nūveita.

Tai pōriš tovys dīnenis

I nūskumeigys naksnenis,

Kai dreiz nūveita pučeitá,

Tai pōrskrīš tovys stuņdenis!
Poša zynu ka iznikšu
I dreiz myužeigi aizmigšu,
Tūlaik, o dōrgō mōsená,
Namekláj maņ dōrzenī,
Bet áj iz smiļkšu kaļneni,
Vaicoj kur tova mōsená,
Tī mīreigi jōs gaļvená
Guļ zam cīta akminá.

4.

Pi līknenis stōvādama,
Pučēitis lasieju
I pa celeni īdama
Vaiņuceni veju.
Skaistys pučēitis zīdāja,
Ka iz zámis stōvāja,
Ka nūrōvu, rūka auga
Bydto kai nabeja.
Niu aš augu jauniņka.
Bet dreiza i mudriņka,
Dzeivōju bez vysa ļauna,
Vasala i ļusteiga,
Kai pučēitá dreiz nūveita,
Aš nabýšu cik gleita,
Ka nūváss mani nu šanis,
Kai ža vysod naraudōšu,
Ka naspeid, jau saulá,
Īlikš grobā, tī sapyušu,
Kur nūváss dvāseli, tī nūišu,
Koč i celá nazynu.

5.

Mōtá gōja slūtu grīztu
Ar pīcom maitiņom,
Poša pīktō pedeleitá,
Nūsleikusá raseni,
Náš rasená, napanáš,
Īnasusá Daugová,
Náš Daugova, napanáš,
Īnasusá jyurenī,
Náš jyurená, napanáš,
Izsyt viļnim maleni.
Tī izauga kupla līpa
Ar deveinim zarenim,
Tī muns bōlenš kūklis škālá.
Skaņ, kūkleitis, napaskaņ,
Kai skaņ dōrga dvāseleitá.

6.

Pōr tyltu jōju, nu zyrga krytu;
Dubļūs tī aš vōļōjūs,
Aš tī gulieju div nedelis,
Nikas mani nameklāja.
Atskrāja pi manis trejs dzagūzis,
Vydā tymsys naksnenis.
Kiukova vīna kōju galeni,

A ūtrō pi gaļvenis,
A šei treša, raiba dzagūzá,
Kiukova pi sirsnenis.
Pi kōju mārša, pi golvys mōsa,
Pi sirsnenis mōmulená.
Žálova mārša pušmieneša,
Mōsa goda puštreša,
A mōmulená, manis aukliejená,
Cikam dzeiva gaļvená.
Mārša palaidá maņ nu tōs vītys,
Mōsa da bazneicenis,
A mōmulená, manis aukliejená,
Tei da pošys dzimtinis!
Kod aš nūmieršu, iz grobu īšu,
Nivīna naredzeišu,
Zvanās zvaneni, skanās varganis,
Raudōs mani mōmulená.
Napīcálš mani žalums māmenis,
A ni baļstenš zvaneņu,
Paglobōš vydā kapeņu,
Grobā sešu dieleišu.

7.

Sarksneits reita pusī dag,
Nakš, timseibys mōtá, bāg,
Dīn dereiga saulá lāc,
Vysur spūdra gaisma aust,
Gailš ar Dīva gūdu skaņ,
Mýs nu gultys ōrā dzan!
Ak, tu cylvāks, prūti kaunu,
Laiks nu gultys ōrā nōkš,
Pateikšonu Dīvam dūš
Cikam saulá zámī rīš!

8.

Trejs prīdeitis silenī,
Vyss trejs vīnu šmuidrumeni,
Vīna ciersta, ūtra leika,
Treša leidza leigojās.
Trejs maitinis māmenái,
Vyss trejs vīnu skaistumeņu,
Vīna audá, ūtra mátá,
Treša roksta zeižauteni
Dūd, maņ māmeņ tū maitini,
Kur rakstāja zeižauteni,
Ka nadūsi tōs maitinis,
Aš nūmieršu biedenī!
Kur jiuš mani globōsit
Žálobōs nūmyrušu?
Puču rūžu dōrzenī,
Zam rūženis sakneiņom!
Iz tōs dūbis videnī
Izaug kupla rūžená
Deveinim zarenim.
Vysi vaci, vysī jauni
Ni lapenis nanūrōvá,
Atīt divi Dīva dāly,

Ti nūlauzá viersyuneiti,
Nūlauzuši viersyuneiti
Izpuškōja capureiti,
Īt Mōrys bazneicā.
Vaicoj Mōra raudōdama,
Kur tu jiemi dōrgu puču?
Itei navā dōrga pučá,
Itei dōrga dvāseleitá,
Žālobōs nūmyrusá!

9.

Sudobrōta zeilá čārcá
Reigys myuru malenī,
Lāč zeileiņ tu zámī,
Īsim obi Vōczámī,
Grīzsīm tyltu par Daugovu
Nu vacim dalderim.
Pōri jōja jauni puīši,
Vysim bāri kumieleni,
Pretim gōja jaunys máitys,
Kai lapenis čaukstādamys.
Vaicoj máitys nu puīšim:
Kam jiuš sīvu najemot?
Pārņ sacāja mīžu vainá,
Kaida vainá šūrudiņ?
Šūrudiņ taida vainá;
Apeineiši nazīdā!

10.

Pi Dīvená lab dzeivōti,
Trejs olūti pogolmā,
Vīnā dzārā raibys gūvš,
Ūtrā siermi kumieleni,
A tī trešā saulis máita
Bičereiti balynōja,
Saulis máita vielájās
Iz laičīnis stōvādama,
Dīveņ! tovu breinumeni,
Kai jei tī nanūsleika!

11.

Kryst krystim šolka būrťš
Mys mōsenis gaļvenī,
Kur jei jāmá, kas jai dāvá?
Máš, bōleni, napierkom!
Kō sauleitá spūdra lācá,
Ka cik spūdra naleigōja?
Kō mōsená skaista augi,
Ka ar gūdu nadzeivōji;
Ka ar gūdu nanosōji
Sovu zeīļu vaiņuceni!

12.

Gōja máita iz olūtu,
Pec solta iudisnená,
Puiškins klīdzá pakalī:
Ak, tu máitiņ, pagaid, mani!

Ak, tu puika, puīskineņ,
Glupū tovu padūmeņ!
Naklīdz vysā gaļvenī,
Tāvs stōv aiz vōrteņu,
Saucá maņ iz dōrzeni
Maganeņu parevātu.

13.

Aš bȳtum i šūrudiņ
Jauna puīša ļaudavená,
Bōbys pļoukšys sapļoukšāja,
Ka aš rasnu dzeji spriežu.
Timsenš beja, naredzieju,
Kaida leida, taidu grīžu!
Kai nu Dīva veseleiba,
Loba gona drābá beja,
Ni leitenš izmiercāja,
Ni sauleitá cauri speidā.

14.

Kur tu teci moza pálá?
Da orūdā zierná zogtu!
Kai tī tevi naatroda?
Aš nūbāgu alenī!
Kai tu tī nasasoly?
Sazakiuru kaula guni!
Kai tu tī nasadagi?
Apzaspraužu ar odotom!
Kai ašnis natácāja?
Apzatrīpu ar vacu svīkstu!
Kur tu jiemi vacu svīkstu?
Vacōs mōtis teineitī!
Kur tū jāmá vaca mōtá?
Raibys gūvš cīcenī!
Kur tū jāmá raiba gūvš?
Zalis zōlis galenī!
Kur tū jāmá zalá zōlá?
Dīvs īmátá raseni!
Kur palyka rasená?
Satácāja jyureņōs!
Kur palyka jyurenis?
Tōs izdzārā Dīva zyrgi!
Kur palyka Dīva zyrgi?
Dīva dāly nūjōja
Saulis máitys precātu!

15.

Sadzīžom máš mōsenis,
Niu vīnā vītenī,
Dīvs zyna cytu godu
Kur máš kura leigōsim!
Cyta smīķšu kaļnenī,
Cyta tautu rūcenī!
Kura smīķšu kaļnenī,
Tōs myužu narādžāsīm
Kura tautu rūcenī,
Koč par godu īraudžāsīm.

Dīva dzīsmis.

16.

Reitu, reitu, svātdīnā,
Patš Dīvs staigōja pa mīsta celi,
Satyka mārģu, iudini nosojūt,
O mārģa, mārģa, dūd maņ dzārt!
Nateirs, nateirs tys iudisnenš,
Sausš kūcenš nūsleika iudinī!

O mārģa, mārģa, steidzīs iz sātu,
Steidzīs iz sātu, āj bazneicā!
Jau poši zvoni aizazvanāja,
Poša bazneica atslādzā,
Poši svāci aizadaga,
Poši oltorā misi turāja!

O mārģa, mārģa, kō gauži raud?
Voi āstš, voi dzārtš tāv aizagribāja?
Ni āstš, ni dzārtš aš nagrybu,
Tik viņ aš grybu rajī tikš!

Ok, mārģa, mārģa, natikš tāv rajī,
Kam syti tāvam, kam syti mōtāi!
Nasytu, nasytu, tik viņ rūku pacieļu!
Kam rūku cieli? Tī ir leli grāki,
Steidzīs, atnesit āļnis atslāģu,
Steidzīs, vedit mārģu iz āļni!

17.

Jezenš tak pa celeni,
Jezeni, Jezeni,
Ašņōtom kōjeņom,
Jezeni, Jezeni,
Jezenš tak pa celeni,
Jezeni, Jezeni,
Ašņōtom rūceņom,
Jezeni, Jezeni,
Svāta Mōra satykusā,
Jezeni, Jezeni,
Satyn cīži paladzenī,
Jezeni, Jezeni,
Nas iz Dīva bazneiceni,
Jezeni, Jezeni,
Īlīk Dīva šyupeleitī,
Jezeni, Jezeni,
Sauc eņģeļu paleigōti,
Jezeni, Jezeni,
Eņģeļš soka, leigōdams,
Jezeni, Jezeni,
Uci, ļuli, Dīva dāls,
Jezeni, Jezeni!